

嘉業堂
叢書

廣陵先生文集

第一冊

廣陵先生文集

二十卷拾遺一

卷一錄一卷

嘉	吳
業	興
堂	劉
刊	氏

廣陵先生文集

王逢原墓誌銘

荆公王安石

嗚呼道之不明邪豈特教之不至也士亦有罪焉嗚呼
道之不行邪豈特化之不至也士亦有罪焉蓋無常產
而有常心者古之所謂士也士誠有常心以操聖人之
說而力行之則道雖不明乎天下必明於己道雖不行
於天下必行於妻子則其言行必不孤立於天下矣此
孔子孟子伯夷柳下惠楊雄之徒所以有功於世也嗚
呼以予之昏弱不肖固亦士之有罪者而得友焉予友
字逢原諱令姓王氏廣陵人也始予愛其文章而得其
所以言中予愛其節行而得其所以行卒予得其所以

言浩浩乎其將沿而不窮也得其所以行超超乎其將追而不至也於是慨然歎以爲可以任世之重而有功於天下者將在於此予將友之而不得也嗚呼今棄子而死矣悲夫逢原左武衛大將軍諱奉謹之曾孫大理評事諱琪之孫而鄭州管城縣主簿諱世倫之子五歲而孤二十八而卒卒之九十三日嘉祐四年九月丙申葬于常州武進縣南鄉薛村之原夫人吳氏亦有賢行於是方娠也未知其子之男女銘曰

壽胡不多天實爾嗇曰天不相胡厚爾德厚也培之樂以不罷嗇也推之不怨以疑嗚呼天民將在乎茲

廣陵先生傳

門人劉發

王氏舊望太原自先生之七世祖居於魏之元城不知其始何遷也叔祖父乙居廣陵先生幼育於乙故遂爲廣陵人年十數歲晝從羣兒嬉夜獨誦書往往達旦不眠率以是爲常未嘗從師爲辭章卽雄偉老成人見之皆驚年稍長倜儻不羈束周鄉里之急爲不義者面加毀折無所避人皆畏而服之里人滿執中謹厚人也一日先生過之執中以先生所爲爲非是先生因自悔更閉門讀書久之所得益以闕深乃爲竹賦以自廣

具載文集

茲不錄

其姊寡居貧無以自存乃聚徒天長已而積薪之

中得芝一葉先生有感焉乃著藏芝賦賦序多不載載

其賦

具載文集
茲不錄

是時丞相荆國公赴召道由淮南先生

賦南山之田詩往見之公得先生大喜期其材可與共

功業於天下因妻以其夫人之女弟焉

詩具載文集
茲不錄

既而

徙高郵太守邵公必延請主學先生辭不獲已強應之

尋亦辭去邵公爲部使者以其節行聞於朝廷不報先

生既喜退隱思江南山水之勝乃遷居潤賦江上山中

之詞居頃之熟於潤之山川道里又著遊山記以寓其

意

具載文集
茲不錄

居無何以江陰幽僻乃去潤遷江陰江陰

地下溼得疾苦足弱因復遷常未幾以足疾終天下士

大夫無論識不識皆痛惜之荆國公爲誌其墓

已冠編
首茲不

錄荆國公既誌其墓又哀思之著於詩多至十數篇先

生德業之敏如駕四馬馭夷路駸駸驟馳雖健步者邈不可及然聞一善言見一善行未嘗不歎慕自以爲不逮事寡姊如事父教姊之孤兒不啻己子歲時祭祀於其考妣必流涕親識饋遺纖介無所受諸生有獻度其家貧禮雖甚勤不取也平生爲文多操紙立書未嘗有橐或有橐隨輒焚毀故其終家無遺文先生方生管城君名之曰令兒未及更立名而管城君卒故先生因名令初字鍾美建安黃莘以其造道之深字之曰逢原吳氏從先生一年而寡歸治田桑布素以待盡其趨操論議是皆宜爲先生配先生旣終方得女荆國公爲擇所宜歸歸吳人吳師禮亦名士嗚呼道之不明於世久矣

惟道之不明故士於出處皆莫知其所宜守仕於朝廷者知進而已時不足以有爲雖或援而去之猶不能自止也不然則溺於厚利苟徇世俗以自私無足道也隱於山林者知退而已時若可以有爲雖或援而出之猶不能自屈也不然則喜於名高苟違世俗以自顯無足取也夫天下有道以道徇身天下無道以身徇道古之君子無必出也無必處也顧道何如耳苟外於道而拘於出處之迹宜其無自而可也方先王之盛時所以造士者有術優游崇養成其自得之實而不使其少累於外物故士多見夫道之大全而進止行遁無所於逆三代而後世不知所以造士士未明所以行已而紛紛外

物既已變易其思慮矣則其所守無所適當固其所也
嗚呼若先生者可謂豪傑之士矣去三代之久如此而
以宏材敏識偉節高行特立於一時使其無不幸之死
而幸與世偶則其所施設當如何哉雖然以太王王季
文王武王成就天下之士至於易商爲周而士之備道
德之美者宜不可勝數矣管蔡一以流言而朝廷上下
遂皆信之知保周公而賊四國者才十夫而已然則士
之不待文王而興者豈特罕聞於後世哉雖先王之世
固已然矣推此則若先生者其可易得哉世之知先生
者或以其文或以其行未爲知先生者也知先生者唯
荆國公而世或疑之故詳先生之行事而論次之如此

廣陵先生文集目錄

卷一

藏芝賦

懷感賦

言歸賦

竹賦

倚楹操

鷗鼠操

噫田操

終雌操

終風操

夕日操

於忽操

辭粟操

嗽操

樗高操

松休操

南山之田

送黃莘任道

送黃任道歌

翩翩弓之張

我策我馬

無衣一首

效醉翁吟

桃源行

我思古人

魯仲連辭趙歌

山中詞

江上詞

廣陵先生文集卷一

嘉業堂叢書

逢原王 令著

藏芝賦 并序

丙申歲自四月至六月

一本作夏四月

大雨而余之所客天

長縣東北皆瀕

一本作邊

湖澤地浸以下頗以水爲患傷

草木多死邑居無薪芻而益貴薪益來自遠以予之

所居則薪之自北來者常售於余閒而有得若枯華

斷穎根梗蒂芥支離擁腫與碩實所

一本作頗

異於常草

者皆兒取以戲就其中嘗試視之余得則芝也折傷

不完計之於全此當一葉耳不知其佗安在也其生

雖不知遠近要皆在縣之北以常負薪之所來則芝

從可知也示人

一本作以
示人之示人

則不齊

一本作不能辨

有由是而

知有芝有由是而信爲

一本作有

芝有雖得是而弗之信

者然芝之爲物不常有而或出可愛者也自古詩之

作見於今者凡三百篇其以風賦比興而附見於物

若蘋蘩薇蕨荇苞

一本作苞

苦藿蕘唐菑蓬瓠匏瓜葛鬱

奠葵蕘葑芹藻莫茅茶蔞苓蓬莠蒿苹蓂蒲萑葦雍

茨蕭艾稂苽蒼芑禾麻菽麥黍稷豆菽秬秠糜粟稻

粱菅紉卷耳芣苢菁莪莠萋荷華游龍茹蘆芍藥之

類雜見並出然此特草耳其多蓋如此而未嘗及芝

也自詩而下長辭章而善自託者獨有屈原今其離

騷九歌具存而可考然其況意所及自詩人所紀之

外復益以江離芙蓉杜若薜荔木蘭白蘋菖蕓揭車
蕙芷茵菊芰蘅蒼茱施蕪葑蓀而地所常產目所同
識之草盡矣若夫陳忠而直私忿廢而怨逐託於彼
而取此以見義此則子之所知至於道則子不得而
一也然稱類已眾而芝復獨遺是誠何故耶說者遂
以九歌之三秀爲芝子以其不明又其辭曰適山而
采之則芝非獨山草蓋未足據信也及觀漢樂歌蓋
當時文工槩人緣飾世治以裁一本無主意耳非有
如詩人騷客鬱於中而不得言憑於物而後見者皆
非子所好也令子得芝而賦之意皆在於賦序故不
道也

庭句突萌抽蔚擢秀孰非春兮坯培壅堙播漑軋蒔孰
非人兮不爲常生特見挺出芝則神兮靈幹不阿眾葉
類附不孤有鄰兮生莫時期毓無種裔天生德兮芣苢
一本薦庭蘼蕪荐道退野卽兮生無一本本根拔不滯
茹無吝惜兮榮而不華槁而不枯莫損益兮茨萊翳陰
高出下蔽適以取容兮朝菌射干齊長並秀德不校同
兮荒原穢壤棄放委廢若將終兮知者謂一本誰何爲
來哉似不必逢兮困于不知束于薪蘇自信不恥兮摧
戕折傷披本斷幹禍不自己兮火炎木焚投置不縮知
命有止兮偶於自生不祈見聞吾與爾已兮

懷感賦寄滿建中粹翁 并序

懷感賦者何感于此而懷于彼也孰可懷之河東滿
姓粹翁其字也懷之者何賦以見之也

朝忽忽兮置食而歎暮戚戚兮默笑與言莞襲襲而重
美兮几按按而已安宜而能自休兮何不安以坐眠既
幾乎而冠兮衣而襃完出可以遊兮入居而端幸竊而
得兮它無病患豈怡融之不有兮曷苦心而蹙顏嗚呼
莫知我思兮思將奚殫念彼淑人之遠兮東南之偏其
人雖小兮已冠而人肩其德孔明兮百燎其燁既濯潔
於江漢兮又秋陽暴其明鮮我俯仰而不知高且厚兮
疑此而爲地天苟世之無之兮猶將盼千古而懸懸既
有而不吾親兮如之何而不思旃企長塗之坦坦兮人

百馬轅不係而羈於我足兮勢不得而自前嗚呼命也
兮不愚則難吾從事於人兮亦久有年旣齟齬於不合
兮閒一收于百千唯燭外不燭內兮一本作言恂恂如可信兮但見
眇美而笑妍一本作面晚美而笑妍唯其心不可量兮如平流之
與深川忽揚而波兮激而爲湍以木而涉豈不旣利兮
亦時忽而摧顛昔吾平地而不之信兮今乃爲解維之
船已濟而悔兮嗟曷爲乎此緣以是而望夫子兮實純
白而完堅使我有得如夫子者兮則我之思將二三而
不專今不見而疑無兮浩東望而汎瀾非我能一於夫
子兮實世無夫子而使然

言歸賦三章

歸乎歸乎從茲世以奚爲世不能以是而從吾吾安能
從世以適非求我志則不得苟以食則從之非大人之
獨畏吾且慙於臺豎之窺彼皎皎之潔不受汗曉曉之
高不受瀟吾盍由一本此以歸乎

歸乎歸乎人誰適從盍求一本吾之志乎懼杲日而有

一本作逃何恤影之息乎從夫人以適越眷我車之柅

乎不剗足以徇屨合終跌而已乎嗟匏瓜之不食安知

不得之一本濟乎

作自

歸乎歸乎我何歸乎吾食無田吾寢無廬吾爨無芻吾
餽無菹四方不可遊吾亦無馬以取道眷魚鹽與工賈
吾豈從買賣子以爲撓然則無以歸而奈何安吾命以

施夷從吾志以委蛇歸乎歸乎歸何時乎南山之阿

竹賦

於此有物焉其材劇而色剛其軀瘠癯不配所長色盛
氣充膚理有光臨臨兮其高其可仰也挺挺兮其直其
不可以枉也毅毅兮其羣其不爲黨也其立自樹一本作直
而不倚其長絕眾而不離恬無盛衰以聽四時置身常
安視物死生弟子不敏昧於老成罹世斲則甚者遇烹
其守不移附者益一本作日增愚所不知請筮以明筮曰斯
夫其始甚銳既極而止一本作上者歟後生晚起超出輩類
者歟確乎不拔以節終始者歟死傳其徒不私以一本作其
子者歟生久處而不回死知命而不恐老者求以自輔

少者得之而無用是其繇曰誰藏孔殷而不思藩彼架
未柱我安事一本作俟樣優哉游哉聊以永年幸聽筮之請
以竹言

倚楹操 并序

魯漆室女倚柱

一本作楹

悲吟鄰人疑其有淫心而

一本無有

淫心而

欲嫁也漆室女曰楚

一本作魯

人得罪於其君逃

吾東家馬逸蹈

一本作食

我園葵使我終年不食菜我西

鄰失羊請吾兄追之霧濁水出使吾兄溺死終身無

兄

一本作使我終身無兄

政之致也吾憂國傷人心悲而嘯豈

欲嫁哉自傷爲人所疑入山林見女貞之木歎息絃

歌作二操而自經死

馬則食葵而予則飢盜則得羊而余無兄知誰爲此一本
作國兮余不聊生誰予哀兮予思深中忽忽兮外不知其
嘯吟野哉鄰妻兮曾謂予淫以已逆人兮余不知其何
心

亡羊奔奔豈不有鄰子可閉門亡羊不復去何自逐身
則非牧霧濛濛兮水瀟瀟謂兄無行兮兄行不忍一失
於鄰而忍失厥生雖然一本無此二字殞子之身兮其亦如亡
羊之鄰

鼯鼠操 并序

魯文公七年鼯鼠食郊牛之角魯南之野老聞而歎
曰不可不知懼也既而又曰天下之事備矣

鼯鼠鼯鼠實食其牛牛則不知彼牛彼牛既卜以郊傷

則免之

鼯鼠傷物而物不知故世謂之甘口鼠

噫田操四章章六句寄呈王介甫

田彼黍矣則食于秋我人之耕載芟載薶

一本作春載未薶

豈

不憚勞將食無敖田彼黍矣幾不螽蟻我人之耕而不

謀年惟其

一本無其字

不謀年是用卒食于田伐木伐木無

廢于勤不足柱榦猶用以薪豈弟君子無易于人誰能

一本

云采芹不適有獲果蓏樹之則食其實豈弟君子孔

敬且力

終雌操

林鳩之雌兮不有巢而子兮而有巢以止兮吁嗟乎已

兮終雌之從兮吁嗟乎雄兮終巢之樂兮吁嗟乎鵲兮

終風操

雲之揚揚油油其蒙望我以雨卒

一本作適

從以風雲之油

油揚揚其去我挽不可泣立以伫終風不休終雲不留
不雨我田不穀我收巖巖南山有川其下徒能必雲不
能必雨藜藜者林有越而樛人伐以歸我徂安休嗟今
之人願已是求有頡者木曷爲而材大析以薪小生何
哉嗟今之人誰同我哀

夕日操

嗟嗟夕日逝何忽兮有輝而星爾留曷其我視而冥我
適不行我晝日乃傾獨何求于爾星嗟嗟夕日不尙有

朝噉噉君子去誰繇招死如可從生百不聊釋釋道周
伊誰之圍夙不築自一本無垣今安以樊人各有心亦
不思旃

於忽操

劉表見龐公將起之而公不願也表曰然則何謂公

曰我可歌乎既歌命弟子治一本之凡三操

於忽乎不可以爲其又奚爲離婁之精夜何有於明瞽

曠之耳聾者亦有爾一本作塞束王良之手兮後車載

之前行險以旣覆兮後逐逐其猶來雖目眇而心駭兮

願其能之安施委墨繩以聽人兮雖班輸亦奚以爲

於忽乎不可以爲其又奚爲榱榱榘榘之累重願柱小

之奈何方風雨之晦陰行者艱而莫休居者坐以笑歌不知歷之忽然兮其謂安何

於忽乎不可以爲其又奚爲謂鷄斯飛誰得而羈謂豕斯突何取於縛是皆以食而得之吾方飢而後噫雞兮豕兮死以是兮

辭粟操

子列子辭鄭子陽粟歸而作是操

食人之粟飽復何

一本作笑

爲當人之賜罪亦

一本作欲

何辭有

以我爲是兮豈無以我爲非已兮已兮吾何以勝人之言兮

陬操

孔子去趙作

行曷爲今天下老我身而不歸人固捨我而弗從吾安
得徇人而從之昔所聞其是今今也見之則非嗟若人
之弗類尙何足以與爲彼天下之皆然嗟予去此而從
誰信亦命已矣夫固行矣而曷疑

樗高操 一云山樗操

惠子去聖

一本作宋

望大樗而作

崇崇北其上有樗

一本作崇崇北
山其山有樗

遠者以爲梁或者

爭以柱就而睨

一本作視

之曾無事於樗櫨嗚呼木乎期我

於遠者歟

一本作何取
於求室歟

松休操

蔚彼南山一本作北山有松其猗孰堂而基孰壤不支遠莫與

一本作以識其一本作斯斬以狙猿之杙是近是度謂一本作喟家之

無桷烏乎松乎予歸此休乎

南山之田贈王介甫

南山之田兮誰爲而蕪南山之人兮誰教墮且來者何
爲而徑者誰趾草漫靡兮不種何自始吾往兮無耜吾
將歸兮容我止要以田兮寄我治吾耕淺兮穀不遂一本
作耜耕之深兮石撓吾耒吾耒撓兮耕嗟難雨專水兮日
專旱借不然兮穎以秀螟懸心兮騰開口我雖力兮功
何有雖然不可以已兮時寧我違而我時負

送黃莘任道赴揚州主學

子之來兮東之舟暮不至兮誰牽

舊本作挽

以留子之去兮

西之馬朝何亟兮不秣而駕駕胡

一本作何

適兮徂揚揚之

郊兮泮之央泮之冰兮春之水泮之戕兮芽茁于涘泮

之鷺兮潔白以止泮之上

一本作宮

兮除埽不泮泮之人兮

立以望子久不可待

一本作待子不來

兮足併以跂子未至兮

謂奚子之至

舊本作來

兮何以慰之招其來而挽其去納以

寬而不嚴以恕增其長而救厥玷

一本作咎

失培其根而使

華以實泮之人兮子喜予先何適兮不夙吾治

送黃任道歌

吾門之達兮爾可款以入兮進之不時兮吾豈不爾待
兮何後未至兮前已過之來猶有望兮去何勝追俯吾

著直居切而卽兮況堂若室兮又歌曰

敖耶學耶爲來往耶衣之茶茶冠漆漆耶何進趨之舒
不若退走之速耶雖終不我聽兮猶無貽我嗟

翩翩弓之張兮詩三章寄王介甫

翩翩弓之張兮其亦弛則藏兮惟此乘馬不秣而駕惟
彼乘駒不駕以芻翩翩弓之蘇兮其亦弛則棄兮廐我
乘馬不適以駕同彼乘駒亦食以芻瞻彼車矣旣微其
輻有駒斯服有馬斯牧心之憂矣聊以反覆

我策我馬寄王介甫

我策我馬將安從人之衝衝誰適逢言歸于東吾策吾
馬將安求人之悠悠誰適謀言東之遊井則有泉渴者

俯之燎之陽陽寒者附之君子則高吾猶仰之

無衣一首招黃任道歸

豈曰無衣不能素裳縫齊有鏘直韞以方豈曰無衣不能素履絢以爲戒夙夜以無怠素裳芟芟誰涉不褻素履几几誰涉不止始也何所爲我推我宗惡予之無從睢盱以爲恭今也旣宣吾力羣心慝慝毀予以自德曾莫肯已直爾旣目矣何爲而眊聰亦云聽曾莫有告謀及于道佛相訕以笑謂白蓋黑或者亦以赤行何必有足巧言以成迹以我有常從爾罔極翩翩者舟在河之涘人待不至亦以自濟嗟爾君子歸歟余遲

效醉翁吟

一本云寄題醉翁亭

山巖巖兮谷幽幽

一本作山巖
巖兮木修修

水無人兮自流始與誰

兮樂此昔之遊者兮今非是清

一本
作靜

吾尊兮潔我筭欲

御以酒兮誰宜壽者山靡春兮野鹿遊亭無人兮飛鳥

下喜公有遺兮樂相道語從人以遊兮告以其處高公

所望兮卑公所遊公爲廬兮燕笑以休撫

一本
作撫

山果以

侑酒登溪魚而供

去
聲

羞仰春木以攀華俯秋泉而漱流

公朝來兮暮去肩乘舁兮馬兩御來與我民兮不閒以

處誰不此留兮公則去遽花垂實兮樹生枝我公之去

兮今忽幾時知來之不可望

一本
作願

兮悔去而莫追人皆

可來兮公何不歸青山宛宛兮誰爲公思

桃源行送張頴仲舉歸武陵

山環環兮相圍溪亂亂兮漣漪花漫漫兮不極路繚繚
兮安之棄舟步岸兮欲進復疑山平阜斷兮忽得平原
巨澤莽不知其東西桑麻言言兮田野孔治平聲風回地
近兮時亦聞乎犬雞信有居者兮盍亦往而從之語何
爲乎獨秦服何爲乎異時見何驚兮還錯貌何野而棲
遲問何迂兮古昔聽何感而暗噫秦崩晉仆兮河覆山
移天顛地陷兮何有不知上無君兮孰主下無令兮孰
隨身羣居而孰法子娶嫁而孰媒旣棄此而不用何久
保而弗離豈畏伏於亂世兮猶魚潛而鳥棲寧知君之
爲擾兮不知上之可依豈懲薄而過厚兮遂篤信而忘
欺將久習以成俗兮亦耳目之無知眷敘言之綢繆與

歡意之依稀及情終而禮闕忽回腸而念歸更酸顏而
慘額歎異世之從容惜暫遇之偶然嗟永離而莫同舟
招招而去岸帆冉冉以行風豁山靄之披袂赫曉日之
瞳矓驚迴舟而返盼忽路斷而溪窮目恍惚兮圖畫心
翰張兮夢中何一人之獨悟遂萬世而迷蹤惟天地之
茫茫兮故神怪之或容唯昔王之制治兮惡魑魅之人
逢逮後世之陵夷兮固人鬼之爭雄抑武陵之麗秀兮
故水複而山重及崖懸而磴絕人跡之不到兮反疑與
夫仙通君生其地兮宜神氣之所鍾觀顏面之峭峭兮
其秀猶有山水之餘風憫斯民之無知兮久鬼覆而仙
蒙願窮探兮遠覽究非是之所從因高言而大唱一洗

世之昏聩

我思古人答焦干之伯強

我思古人兮不

一作忽

古今之異時生茲世以誰期欲勿

思而奈何獨斯人之不見聊

一作故

永懷而自歌樂吾行

之舒舒忘茲

舊本作忽忘

世之汲汲睇萬里以自驚兮豈寧

俯以效拾載重道遠兮余欲行而誰與累九鼎以自重
兮顧庭之弗舉矯身以爲衡兮權世之重輕廣道以爲
路兮聽人之來去

魯仲連辭趙歌

并序

司馬遷謂魯仲連不合大義以予考之信然要之一
時則連固壯士而有所不爲此則予喜之

一本作常所喜

壯其辭趙之意惜其不廣也因爲之歌曰

秋風起兮天寒壯士醉酒兮歌解顏螻蛄何怒兮轍下
蟻何鬪兮穴閒紛擾擾兮誰者則賢井方崩兮治隧屋
且壓兮雕椽生則役兮弗繫念此禍至而知悔兮身忽
焉其已死陶唐夏子兮今則古矣彼秦且帝兮連有蹈
東海而死耳

山中詞 登山作

山中兮何游登彼山兮樂夫高棄吾馬以取步降吾車
兮足兩屨石當道兮行旁木礙上兮下俯曾蹈險之非
艱聊憑高兮下顧何所視之乃牛而獨見之如鼠彼侏
侏者出其下兮曾其身之非偃吁嗟徂兮離婁之死則

已古不較其爲短長兮何獨計其高下

山高兮崔嵬山之

舊本作山中之

路兮百折而千回趨前行

舊本

作行而就挽笑顧後使推之彼游者誰兮何以子之車
趨前來

江上詞 渡江遇風作

江之水兮東流湍湍流兮寄人舟舟無柳兮載函重風
乘波兮棹人用濟不濟兮奈何橫中流兮涕滂沱來何
爲兮不待今雖嗟兮安悔舟方乘兮人不吾以覆且溺
兮我同人死

江之水兮東流濟欲濟兮何由水浸浸兮灘露暮濤下
兮夜潦收舟不行兮推之于陸力不足兮汗顏行無由

兮塗足時不逝兮奈何歸日暮兮塗遠去風高兮水波
行躊躇兮望聊逍遙兮永歌

江之水兮東流沿湍流兮望歸舟舟來歸兮何時步芳
洲兮濯足陟南山兮采薇江風波兮日暮望夫人兮未
來

江之水兮東流沿湍流兮望歸舟風滔滔兮浪波苦嗟
往者兮未還惜行人兮將去去何適兮歸何時執子手
兮牽子衣行何如兮來復濟豈無兮它時

廣陵先生文集卷一

廣陵先生文集目錄

卷二

寒林石屏

贈慎東美伯筠

呂氏假山

偶聞有感

寄題韓丞相定州閱古堂

龍興雙樹

原蝗

別老者王元之

答李公安

廣王醇正叔二思詩

書睡

哭辭

古興

秋居

雪中聞鳩

吳江長橋

題滿氏申申亭

晚歲

聞太學議

贈別晏成績懋父太祝

別張粵南夫
溫子堅
元白滿
執中子權
黃翼端微
寄李常伯
滿粹翁

寒林石

廣陵先生文集卷二

逢原王 令著

寒林石屏

號山之遠數千里號石之重難將持舟車號來每苦重
釜盎尙棄不肯攜苟非世尙且奇怪孰肯甚遠載以來
何況號人自珍祕得一不換千瓊瑰流傳中州盛稱尙
主以詫客客見祈世人賤真珍貴假見者喜色留膚皮
強材美幹立修蔭羅列滿野誰復窺我嘗客坐例一見
實亦可愛小且奇初疑秋波瑩明淨魚子變怪成蛟螭
鱗鬚爪角尙小碎但見蜿蜒相參差又如開張一尺素
醉筆倒畫胡髯髭如何石上非自然猶是軟弱從風枝

高樓曉憑秋色老煙容雨氣相蒙垂喬林隱約出天際
醉日遠暝分茫微不然誰家老圖畫破碎偶此一片遺
借令人手弄點畫尙恐巧拙成瑕疵如何石理自生長
安得當世無猜疑高堆黃金募辨說萬口利銳如磨錐
或云南山產巨怪意欲手把乾坤移先偷日月送巖底
次取草木陰栽培天公怒恐浸成就六丁挑斧摩雲揮
世人乘此得分裂鍛琢片段賡財資至今風雨號山夜
樹石號作神鬼悲又云春氣入山骨欲自石裏生蒿藜
根株芽枿未及出卒遇匠手相鑿隳多稱老松已變石
此固翦截根鬚離又云鬼手亦能畫多向石室成屏帷
因知物怪浩難盡誰能向此明是非城狐老能男女變

海蜃口或樓臺吹世閒自是有此類何必詰曲窮所歸
細思此屏竟無用石不中磧木莫一本支徒將文理有
小異招聚瞽說成籠欺咄哉閉口不復論爲語愛者無
我譏

贈慎東美伯筠

世網掛士如蛛絲大不及取小綴之宜乎侷一本儻不

恆斂醉腳倒蹋青雲歸前日才能始誰播一口驚張萬

誇和雷公訴帝喘似吹一本乞少淹盛恐聲名塞天破文章

喜以怪自娛不肯裁縮要有餘多爲峭句不姿媚天骨

老硬無皮膚人傳書染莫對當破卵驚出鸞鳳一本作飄翔

閒或老筆不肯屈鐵索縛急蛟龍僵少年倚氣狂不羈

虎脅插翼赤日飛欲將獨立跨萬世笑謂李白爲癡一本
作嬰兒四天無壁財可家醉膽憤痒遣酒拏欲偷北斗酌
竭海力拔太華鑿鯨牙世儒口頓聲如蠅好於壯士爲
忌憎我獨久仰願得見浩歌不敢兒女聲

呂氏假山

鯨牙鯢鬣相摩捽巨靈戲撮天凹突舊山風老狂雲根
重湖凍脫秋波骨我來謂怪非得真醉揭碧海瞰蛟窟
不然禹鼎魑魅形神顛鬼脅相撐揆

偶聞有感

鯨虺海翻飛陸塵鐵房孤劍枯紫鱗擠排壯士仆不起
天公始自誇爲神誰令夷路牙枿橫不拔不鋤安得平

長星作彗儻可假出手爲掃中原清

寄題韓丞相定州閱古堂

始聞定作閱古堂又聞定有閱古詩揚之遠定五千里
思得兩翅擘以飛偶聞人來說堂事初敞兩壁無塵疵
閒時公來命繪匠親以玉指交畫揮教令某載若某狀
匠拜奉命惟不辭左圖守相父母吏右狀將帥熊羆姿
長冠峩峩偉笏佩闕以玄白爲裳衣屹如丁寧立以議
遜若避讓行而隨圖成儼一本作嚴毅色可讐過吏不敢竊
目窺仍令大筆署行事寫出黑膽朱肝脾死者有靈如
不混合有英氣來附茲故公之謀不知出宜有神鬼一本
作陰助奇茫茫九泉謂已朽豈意一旦存形儀請留中

壁素莫繪待千歲後公以歸當搜國匠第一手狀寫公
像存依稀要知文完武純備遺與萬世瞻師資我知觀
者定墮淚不復峴首羊公碑又聞當世大手筆磊砢詩
句相撐支手搏蛟龍拔解角爪擘虎豹全脫皮鄆州溪
堂遂寂寞韓詩塵蔽人不吹想應從此傳萬世粹玉貫
串珠繁纍小戎何爲尙縮伏久滯公斧血不滋何時功
成事業就兩手一掃清三垂一本作睡歸來天子喜以領泰
階輝煥平無欺一本作欵次招當世草茅士各使呈露心腹
披締裾聯纓上廊廟留與後世圖爲師然後回謝閱古
堂彼合異代今一時

龍興雙樹

春城花草

一本作草木

窮朱殷俗兒趁走腳欲穿閑來無悰

喜自適時到雙樹爲奇觀莊如天官植幢蓋毅苦壯士
蒼衣冠老枝叉牙忽並出似欲併力擎青天靈根深盤
不可究疑與地軸相拘攣不知培栽竟誰手而又始植
爲何年行捫步繞不可問但見茂色連雲煙東風牽人
少遊此佛屋日日重門關雖有大蔭人不及於此尤得
志士憐束蒿爲楹檁爲柱居者略不憂其顛迺令遺材
抱美植不得總載桷與椽高堂傾敝未支柱匠者日亦
經其邊不思大幹有強用反以斧鈍難其堅吁哉誰是
愛材者定知惜此雙樹篇

原蝗

蝗生於

一本作滿

野誰所爲秋一母死遺百兒蕪藏地下不

腐殞

一本作朽腐

疑有鬼黨相收

一本作扶

持寒禽冬飢啄地食

拾掇穀種無餘遺吻雖掠卵不加破意似留與人爲飢

去年冬溫臘雪少土脉不凍無冰澌春氣蒸炊出地面

戢戢密若在釜糜老農頑愚不識事小不撲滅大莫

一本

不追遂令相聚成氣勢來若大水無垠涯蓬蒿滿眼幸

無用爾縱嚼盡誰爾譏而何存留不咀嚼反向禾黍加

傷夷鴟鴞啄銜各取飽充實腸腹如撐支兒童跳躍仰

面笑卻愛甚密嫌疏稀吾思萬物造作始一一盡可天

理推四其行蹄翼不假

一本作反

上旣載

一本作戴

角齒乃虧夫

何此獨出羣類旣使跳躍仍令飛麒麟千載或

一本作始

一

見仁定不忍蹋草萎鳳凰偶出卽爲瑞亦曰竹食梧桐

棲彼何甚少此何眾況

一本作而

又口腹害不訾遂令思慮

不可及萬目仰面號天私天公被誣莫自辨慘慘白日
陰無輝而予昏狂不自度欲盡物理窮毫絲要祛眾惑
運獨見中夜力爲窮研思始知在人不在天譬之蚤蝨
生裳衣捫搜剔撥要歸盡是豈仁者尙好之然而身常
不絕種豈此垢舊招致斯魚枯生蟲肉腐蠹理有常爾
夫何疑誰爲憂國太息者應喜我有原蝗詩

別老者王元之

二氏之來始何自乘我中國方迷昏各投

一本作設

陰誣

作險

張誕妄尋附罅隙爲株根例誇難能壓甚畏鉤搏

天下要推尊其流汗漫已不制尙自衝蕩洪其源一戎
中侵欲內侮猶遣萬甲疆場屯何哉二氏日內壤不思
刷去仍資存嘗聞古人第氣類皆以夷狄禽獸論借乎
無倫弗禮義幾稀不得人相羣我觀世之陷此者不啻
火立足向燔豈期之子既自悟不思跳出乃欲踣予方
往就西北食聞子亦整東南轅雖然去就固在子安忍
惜手不試援

答李公安

自名士者紛如毛多見博帶裳衣褒如其可學不可逮
一本作始三滿夫子皆儒豪其文淵源尤可愛江海駕蕩相
吞滔方我少時未識媿引領日望聲齊高窮吭折吻氣

力絕始盡退伏非所曹近來筆硯思置去新詩苟有亦
自韜閒時屢索不敢出若欲獻貴賤厥操李君南來久
有日我始得見試指指忽逢詩挑欲我接快句銳利磨
一本矛刀要令口獻近章句若急敵迫不可逃顏頰舌
澀不易吐滯若亂緒強抽搔惟其自陳尙訥忤况又聽
者寧不聳退歸自與敗者比誓欲棄甲弓矢囊新詩見
投又須和咄哉自守何不牢

廢王醇正叔二思詩

木落不去根水流常背源木落方病寒尙覆本根溫水
流忘由來散亂一本卑溼牽讀子二思詩起予二者言

木實類君子老有孝感

一本

存水亦

一本

人迹然動由

名利

一本作爲世俗

纏使我父母感

一本作感我父母恩

一夕身百翻人

世但可悲

一本作人生徒可悲

小官何足言情義有相奪心迹因

此一本

作已分勉之多自寬行見西歸轅

晝睡

太古一去浩萬世百智競起紛修治

平聲

交將斫力潰瘡

痾縱得平好無完皮傾山竭河論麴水都投大海爲酒

池中閒秫稻不滿掬日益醞釀成澆漓不知澤風竟何

適萬手齊舉招

一本作爭

不回北窗清疏鳥聲好晝榻自穩

閑支龜塵埃不到日影薄枕簟拂拂生涼颺四支舒安

百慮廢髣髴認得太古遺散

一本作精

魂怡愉不旁適心肺

正靜無邪思因能不有世俗夢獨與潭氣相盤嬉伏羲

持刀刻爻畫古意蕩盡無銖釐睡無吉凶無失得縱欲

強卦安能爲故能獨存至今日人各已

一本

有反不知

須知睡義大亦

一本益

甚豈獨牀第誇昏迷君子勞心事

業暇得時休息安天倪小人一心包萬險迨退就枕皆

平夷使其睡心大充擴去與君子何毫絲當年嘗聞曲

肱樂曾及至聖宜無非何況於夢更有得不見公且因

嗟衰後來紛紛不知樂捨去大路趨邪歧竹林猖狂事

飲鍛捫撥蚤蝨無留衣好惡紙上浩萬端竟不及此亦

可嗤蚊蟲紛然始誰造一一口吻加針錐食人肌膚得

腹飽不解默去猶鳴飛攘拳揮臂不可卻聒耳不異笙

匏吹雖然今尙爾無奈當有獵獵秋風時爾軀糜潰爾

口壤我牀安穩我枕敲平時多賢責不及會日偃暝休

恬怡

一本作怡怡

哭辭

一哭摧心肝屢哭彫朱顏心肝摧日痛朱顏彫日乾二十人未壯我衰已毛斑古人不得一本作可見今人誠可歎

古興

出門將何從與物隨紛紛不得所欲爲還與俗人羣外跡久已非獨嗟心所存自信有可羞彼人何足論

秋居

秋居寒蕭疏秋意愁交并飽犬無吠志飢鳥有凶聲庭空鳥交下牆穴鼠更爭浩歎欲出門日暮不可行

雪中聞鳩

孰謂拙者鳩已厭不可彈我寒方病雪爾何雪

一本自
作喜

喚寒城千萬家什伍赤兩脣通衢結泥冰走指墮或半
門閉市無人竈冷煙不爨俗以雪爲賀我獨雪之歎富
貴宜爲憂不憂亦何患

吳江長橋

老匠鐵手風運斤一挾刃入千山髡明堂有柱不見用
此爲失地猶濟人西瀆巨澤江海通獰風撼地波撐空
當道獨能支地險更東安得與天窮莫比垂天神莫比
跨地帶渴龍枯死乾無鱗絕海失舟蹋鯨背秦帝東遊
逐仙迹累重肉多飛未

一本
作不

得三洲水隔不到山借得

紫虹三萬尺平時塵土蕪英雄吾亦棄劍來遊東欲觀
水盡朝宗海安得身乘破浪風爲約它年可歸處頻倚
欄干不思去季鷹范蠡未足竒待我爲名千古歸

題滿氏申申亭

申申亭者名自誰河東丈人身銘

一本作名

之方其作亭自

休息固欲申暢名其題雖然自奉頗優樂豈敢兼忽當
世爲若日所憂非所及因以遯世無悶辭丈人疏高喜
自適去不限約來無時門無賓僚車馬絕室有几杖衣
冠一本作巾冠一本作巾敲夜徑行招海月伴晝榻坐與天雲期春林
喧和鳥聲好勝聽俗論相啞一本作嘔伊塵埃縱爾得風力
卒不到此徒自飛亭前朱朱有冶態亭下白白無俗姿

好木留存竟見實惡草鋤拔無容芟嘗聞景勝未易敵
須有大句相參差故吾經年不敢往日望詩老力可支
偶來爲游適已晚花梢尙有春餘遺高哦繞樹惜時節
拾嚼紅片行逶遲回看北林竹萬箇寒氣一本作翠欲起凌
人威清風時來助氣勢塞甲夜聚言語私方將投閑日
來此腳蹋樹下成交蹊無端塵土又爲隔明日跨馬西
北馳心思夢好定頻到不必直俟歸風吹

晚歲

晚歲

一本作歲晚

意不適新詩老無情萬古共

一本作去

一歎百

年行半生貧憂世累重賤喜身責輕義有不可嗟一本作必
嗟非吾不能平

聞太學議

白日流上天牛蝨無遁形萬目盡爲用而不駭日明穴
鼠夜值螢嗾嗾相聚驚鼠穴不日通鼠足不日行已矣
不自識迺此螢燭矜蝸蝦陷井坎莫與江海爭籠禽不
天飛詎識雲漠冥咄哉浮薄兒勉爲高大營

贈別晏成績懋父太祝

懋甫相門兒家世沓纓紉早年綴官簿青衫蔚於茨本
宜多驕矜不謂銳義敢意貪英雄交一手欲四攬偶來
濫子曾臂擲首已領酒狎誇胸襟頂踵都一膽壯心羞
摧藏義肉喜菹歌要言相死從一本作死相從願豈苟難斬聽
其自陳論峭拔不平漸要之當一切固合不馳黯一本作黜

憶予少年時亦自喜黠濶于今老而悔壯意

一本曰涸
作志

涸

減惜夫相遇遲君放我已檢驟聞強大語若虎餓得啗
已無相高心徒有志氣感春風吹天昏醉目晚愁驂念
當相別去兩懷不無慘何時重來過慰我涸轍噉唯其
去後懷猶一飽復歉幸因西南風時作寄我槩

別張粵南夫温子堅元白滿執中子權黃翼端

微

始吾得三滿自謂得過人一日不見之已恐愚賤濱憂
思叢中來腹腸生毛鱗輕舟刺而南久結願解伸入門
顧我笑喜氣沃以新徐徐相抽尋軋軋聽引陳先生固
大賢擬議何可鄰諸君又相得熱炙香相薰而我拱其

閒貪喜欲失神赤鳳朝百鳥鴟亦來羣然其氣類同
終獨鳳鶴親發爲鳴聲和上下相鏗純苟非治平世不
得此類馴故其聞之者舞蹈相搖振輕風促回刖後會
無涯垠作詩謝幸甚顛倒迷歡欣如將銘自賀又欲書
諸紳

寄李常伯滿粹翁

我思古人不可見獨以兩眼紙上求苦讀纔疲卽伏枕
亦冀夢寐從之遊每疑賢聖世閒有豈獨古出今則不
心之所藏弗面見常恨世腹不可搜雖然其中充美者
閒或外發文彰彪堙淮南南誰名聲盛說李滿乾萬喉
青天白日所同見眾亦不敢加瑕疢而子零丁始就學

獨矯眾棄先拈

一本作抬

收要其所學與必至不止顏孟須

孔周決將健走獨取到願我不肯少待留新詩惠見荐

自礪若遇重壓併見投星機織成副地錦神冶鑄出春

天矛輝光交華目反眩嚙咀過美涎并流退歸畏愛復

願學恍若見富潛謀偷顧其才力非當對猶以一髮紉

十牛使我苦勉不少

一本作可

得搦筆欲下先慙羞有如姣

惡各具

一本作異

體肉骨不可強凋鏝或云才華乃天與何

寡不益多仍

一本作猶

衰幾時高車得

一本作來

會合預期蹈拈

呼旁陬臨風呻哦欲有寄自恨拙繭無長抽

寒林石

常聞千歲松爲石豈意今逢林出屏苟非木根久自化

豈此石理能有靈世閒萬怪浩莫一本問枉哉山海徒
作難

有經舒山號水固險異疑有神手藏幽冥

廣陵先生文集卷二

廣陵先生文集目錄

卷三

謝東丈見贈

夢蝗

寄滿子權

再寄滿子權二首

答東徽之索詩

寄滿衡父

自訟答東熙之

謝李常伯

對月憶滿子權

八檜圖

秋夜

答束孝先

戲食雀

金繩掛空虛

寄洪與權

寄滿子權

冬陰寄滿子權

廣陵先生文集卷三

逢原王 令著

謝東丈見贈

賤生不自辰親沒身孤零家無一稜田不得農以耕巧

智不迫人工賈難自名妄來覩

一本作親

文字朱墨紛縱橫

命窮心狂高不肯束世程揭欲望正軻今昔相招迎去

古遠莫到復今難回行窮步匍匐歸失虎犬不成顛倒

塵土中甚若魚噉羹祖死不反骨姊寡歸攜甥蒼黃無

爲謀歎慨私失聲叩頭屋厦借解衣鍋盎

一本作盎

廣本

作更甌石固莫致升擗猶時營學左世共笑身賤人交輕

父戒子勿效妻引夫無朋妄承西來招喜色轉以解非

惟迹脫死始有心期生兒童相回環朋友推弟兄有問
多無對新聞徒慙驚自嗟陋淺人偷竊幸未黥風窗敞
清虛飽腹摩膨脞睡足起有書案几交堆盈自喜主人
仁不我賢而惇新詩重來貺褒揚借光榮何以示相謝
心銘踰血盟

夢蝗

至和改元之一年有蝗不知自何來朝飛蔽天不見日
若以萬布篩塵灰暮行齧地赤千頃積疊數尺交相蕪
樹皮竹顛盡剝枯況又草穀之根莖一蝗百兒月再孕
漸恐高厚塞九垓嘉禾美草不敢惜卻恐壓地陷入海
萬生未死飢餓閒支骸遂轉蛟龍醢羣農聚哭天血滴

地爛皮蒼蒼冥冥遠復遠天聞不聞不可知我時爲之
悲墮淚注兩目發爲疾蝗詩憤掃百筆禿一吟青天白
日昏兩誦九原萬鬼哭私心直冀天耳聞半夜起立三
千讀上天未聞閒忽作遇蝗夢夢蝗千萬來我前口似
嚙囁色似冤初時吻角猶啣喉終遂大論如人然問我
子何愚乃有疾我詩我爾各生不相預子何討我盍陳
之我時憤且驚噪舌生條枝謂此腐穢餘敢來爲人譏
爾雖族黨多我謀久已就方將訴天公借我巨靈手盡
拔東南竹柏松屈鐵纏縛都爲帚掃爾納海壓以山使
爾萬瞧同一朽尙敢託人言議我詩可否羣蝗顧我嗟
不謂相望多我欲爲子言幸子未易呶我雖身爲蝗心

頗通爾人爾人相招呼飲啜爲主賓賓飲啜齏百豆爵
主不加詬翻歡欣此竟果有否子盍來我陳予應之曰
然此固人間禮儻介迎召來飲食固可喜蝗曰子言然
予食何媿哉我豈能自生人自召我來啜食借使我過
甚從而加詬爾亦乖嘗聞爾人中貴賤等第殊雍雍材
能官雅雅仁義儒脫剝虎豹皮假借堯舜趨齒牙隱針
錐腹腸包蟲蛆開口有福威頤指轉賞誅四海應呼吸
千里隨卷舒割剝赤子身飲血肥皮膚噬啖善人黨嚼
口不肯吐連牀列筭笙別屋閑嬪姝一身萬椽家一口
千倉儲兒童襲公卿奴婢聯簪裾犬豕羨膏粱馬廐餘
繡塗其次爾人間兵阜倡優徒

一本作兵
倡釋老徒

子不父而父

妻不夫而夫臣不君爾事民不家爾居目不識禾桑牛
不親犁耨平時不把兵皮革包矛爰開口坐待食萬廩
傾所須家世不藏機繪繡絳一本作繡繪錦衣襦高堂傾美酒
鸞肉鱸百魚良材琢梓楠重屋擎空虛貧者無室廬父
子一席居賤者餓無食妻子相對吁貴賤雖云異其類
同一初此固人食人爾責反捨且我類蝗自名所食況
有餘吳飢可食越齊飢食魯邾吾害尚可逃爾害死不
除而作疾我詩子言得無迂

寄滿執中子權

我愛子權詩苦嚼味不盡窮思欲名狀百比無一近初
如貪追兵屢請忽許進旗旄交叉幢戟劍後先刃方爭

奮拏先忽覩斬亂徇徐驅得平郊萬甲合一陣偏裨走
起頗中堅坐吳臚喊呀鬪志酣髣髴窮敵認前軍奔交
兵後馬走斷糾須臾聲金休萬噪快一雋羣降挑戈矛
叩拜乞用釁蒼黃請命閒竊視不敢瞬玄雲壓空虛半
夜暴霆震睡耳起欲掩驚仆失肝腎壯者固已然況予
乃韶亂及其久詳味欲吐復自恡有如羅百珍次第噉
嚼順貪豐不辭多愛美忘餘餒故其留人口雖久咽喉
潤何時匹馬來一作木畏愛氣兩振唯其未合閒如不獲
謝蘭望風爲此詩顛倒猶合燼

再寄滿子權二首

秋近嘯哀蟲君思云奈何我愚得君思合少君賢勞我

心則多非獨辭源長瀉海爲江河平生未始有點

一本作玷

缺玉日拂拭金燒磨尋常羆與狸見一足已蹉又況一
地卧三虎狗豨雖勇何敢過揚州我何思青山無一螺
午市不畜寶米鹽財如它而吾三夫子一身各正軻瓊
林自生寒結露成冰柯文章日組緯玉機飛金梭誰有
眞珠繩結作張麟羅拔爲當世祥聲爲太廟歌我願參
眾民手足搖婆娑

有錢莫買金多買江東紙江東紙白如春雲獨君詩筆
宜相親綴聯卷大十牛腹要盡寄我無寄人我將攜之
東

一本作攜
之東海去

腳蹋海水洗齒脣轉來清澈飲百斛蕩滌

腸肺無纖塵嘗聞泰山高高處天爲鄰借如無梯不得

上亦欲大叫呼天神鋪陳君所詩譟口雷鼓振世多俗
耳既莫告當冀上帝依稀聞正聲定不感凡類舞躍百
鳳千龍麟安能學俗兒一卷不復伸天公聞否尙未快
一本
作決安得鐵翼穿秋旻

答束微之索詩

世味久已諳多惡竟少好惟詩素所嗜決功欲深造人
安已不休眾恥我獨冒有如獺行跡欲改復自蹈肝腸
困尋搜吻舌倦搏造心靈無餘多爲此日有耗已勤尙
無成既苦每自勞自笑如秋蟬飢極不止噪努力排韓
門屈拜媚孟竈惟此二公才百牛飽懷抱我如餓旁本
作旁者眇眇不得稿不知去幾多窮行竟未到無門隔

藩籬發罅窺堂奧愛之不可入抵觸發狂譟借使苟有成不知竟何要孤名非所求弊俗詎足傲況乃非所及窮海未爲浩不知何時休定訖死與耄因疑今世人恐有我同操徽之才超高竿幢出標纛爲學尙淹蘊富彙不肖暴文章內朱豹外襲一以阜大論尤堅強推舟出行弄珉硖不施功徑欲制珪瑁幸此不我陋教誨日陳告昨因語及詩請我使自道屢謝不得命迫窄遂顛倒被堅誘羸卒伏銳待穿盜取勝雖必然窘窮亦堪悼勉爲瓦礫投幸有金珠

一本作珠玉報

寄滿居中衡父

前會去莫追後見來無期別歎後見難悔恨前會稀惟

吾衡父兄

一本作交

金純玉光輝裁磨殺圭角不與瓦礫齊

大匠陶百窯不閒履下泥一衡舉千鈞何棄毫與釐余

獨胡爲人乃不忍使遺有如橫道芻萬足蹋不疑子何

嗜好殊獨俯掇

一本作捨

以歸整束使不茨欲令雜蘭芝蘭

芝有天香芻賤雜則非然其廁置閒適與薰染資文章

每借觀罅隙晴曦議論使坐聽聾瞶聞英池春園或

承招遊騎亦許隨劇雲愛風枝燕火圍夜棊縱談心一本

作開張倒笑冠蔽披匹馬載以來東首頸脰疲夜夢不

厭勞百里夕一馳想見目與眉百障千藩籬不虞自投

置遂若鳥遭鷗何時獲因緣連筆促馬蹄誓當盡晨昏

不復起退辭

自訟答東熙之

洞洞之室或者穿巖巖之牆或者緣牆緣空穿

一本作牆空穿

緣

來何哉中白玉萬黃金千金玉固非盜所有盜者或

得之伺候得金買衣出人前意氣遂若富者然眾人不

知謂爾富不知爾自

一本作亦

何心顏盜財固爲小人戮盜

名自是君子姦咄哉自訟無自欺幾希不在穿緣閒

謝李常伯

人從東南來忽得連紙詩行義不赫暱名聲無菱蕤雖
嘗誤見辱旋則拜席歸別久謂已忘不圖猶記之長封
大書字願我已忸怩開滕把之讀推與果失宜剝虎蒙
羊猪借使出類奇見豺先自奔遇豢還羣隨是故古之

人爲已賤若斯有聞未之行季路恐不嬉名浮過所實
軻也恥以非今而承所賜迺此亦可噫賢者寧過哉當
是我有欺忍媿讀終篇喜驚改肝脾擘擘誨教言舉舉
仁義辭初令探本根喻以海與池乾坤老六經遺編爛
孔姬尙恐惑異說教之無遷移強聞終日乾仁不三月
違卒以二者終要我勉不疑百誦百再拜下淚如掛糜
一本交朋百愚諛此語聞之誰憶初從粹翁睡耳忽得
提震驚破百昏寐覺悼前迷今而去之久茅塞心叢茨
驟承夫子言快斧加芟蕘舊穢忽剗銷新除一本坦平
夷念當不捨去戴服同冠衣猶恐免袒閒復作須臾離
且將鑷之心不止涅之皮二者苟一能終始庶不遺平

生苦嗜詩此篇況驟馳喁哦夜不休齟齬午忘飢仰嗟
天骨雄俯歎人莫爲星明有常高日圓無食虧讀久口
益饑舌輒涎流垂想當措意初嚼雲吐虹蜺脣牙哆華
鮮肺腸涌光輝故其紙上言飄有霄漢姿何可對酬謝
約海量珠璣

對月憶滿子權

長風掠海來吹月散百鍊

一本作白鍊

青天豁四碧雲鷲不

容綵窗軒颯先秋露氣入簟扇寬

一本作空

庭生夜涼蚊口

不得擅人靜暮客去坐偃適自便清牽睡思醒明發醉
膽健披風睨白日瞪視不爲眩未甘景獨勝思出大句
銜狂搜得無奇猛吐復自吮篇成若奴婢氣骨終一本
作竟

凡賤置棄不復收歎感退自旋起探君寄詩兀坐諷百
 徧駭哉劇雄勁百札洞一箭閒逢騁新奇春雲弄晴霰
 古意終重厚九鼎掛一鉉我嘗笑夫人語富則自願及
 嬰愛君念始自信惓惓閱女當求嬾慕士在獲彥鄙哉
 尋常者何用目識徧得逢誠幸多既別遂堪嗙乖離時
 況久會合卜未先思之不可見飛魂不身戀秋城崔嵬
 高圍我屹若圜安得擘風翅飛出自殿巧爲相見謀
 反覆竟未善惟當遠相要共借月爲面相離苟同天舉
 目亦兩見又況相去閒財止百里縣不知竟可否寄詩
 代請勸

八檜圖

客有要我八檜吟手攜八檜圖來懸掛張滿壁惕可駭
眄顧左右同嗟歎旁摹石刻署名狀各有憑附相寅緣
或高相扶互倚礙或斷欲蹙猶支顛強枝拗回信有力
高幹復俯蛟蚪拳尋根及株逮條蘖例不拔直皆旁偏
雷疲風休雲雨去蛇龍鬪死猶鉤纏安分爪角一本與
作牙
尾鬣徒見上下相蜿蜒不知生時竟何謂略不參類常
木然宜乎今古惑昧者搖擺舌吻歸之仙一尤盤拳老
高大傳云一本
作日聃老由飛蹶當時駕鹿蹋以上跡有町
墮遺相連多應蝎殘鳥喙啄不爾誕者強鑿鑄聃能惑
人已自幸豈此上去能欺天借如聃功可升躍鹿亦何
幸飛相聯於中一本特甚異膚革逆理紐左旋傳云聃

人

一作手

所自樹我知此語定鑿穿苟令實爲聃者植推

以天意猶可言當年曷不紐以右若日世爲左道牽如

何眾輒

一本作識

不省究反重神怪令聃專乾坤中含萬品

彙此獨自異誰令旃

一本作殊陶甄

窮思竟慮莫可索欲世不

惑誰能攀

一本作奏

仙書虛荒喜誕妄推說事理尤繇延世

人一讀卽化變日望飛奮相迷癡豈非此木久樹此浸

漬亦爲異說遷故其形植與生死時以異怪招驚憐先

時世不早斤斧放其老大訛誇傳當年同生好材幹半

以直伐成燒然憑妖附誕相樹立卒自死活終完全葉

枝凋疏不有蔭材直弗柱曲莫轅不知留存護養者竟

以何理惜不捐我有尺鐵大剛利久已鑄斧磨山巔卒

無柯柄尙棄置嬾乞月桂求嬋娟

秋夜

秋夕不自曉百蟲齊一鳴時節適使然鼓脅亦有聲爭
喧鼠公盜悉窺虵陰行獨有東家雞苦心爲昏明

答東孝先

純金出鎔鑪烜赫掩熾火錦成洗春江眾目眩莫奈魚
鹽物誠微誤用幸不涴君家兄弟賢我見始驚夥文章
露光芒藏蘊包叢脞關門當自足何暇更待我固知仁
人心姑欲恤窮餓苟論才不才自合棄如唾憶昨西來
初戚惕侍一本客坐交持駕說口張闔不可鑠閒發辨
經義鐵舌莫摩挫高文忽下投白日駭天墮眩怖欲前

掩布帛不可裹初觀固宜驚獨獲亦堪賀又如遇貴人
繡錦飾婀娜回眸忽自鑑惡面復窶裸屈降心已甘歎
憤志亦頗雄高豈復爭愛恤亦加荷大詩又一本來及
推與太浮過自無賢可稱以是惡甚播譬如享冠人豆
食止則可苟強儋石負蹉跌適足禍何以論報心結草
效魏顆

戲食雀

秋風雲氣寒秋雨晝夜兼飢禽溼不飛左右煩顧瞻有
雀獨飛下施徐入吾檐毛羽刷參差背距交鉤鈿一本
跳乘新春箕取飽公不嫌而吾本有意聽之取微纖忽
驚自飛去馱聿不少淹反就高高枝啁啾氣不恬嗟乎

此微類豈不無以厭來既冒彈射固難貴其廉然一本作而
予乃無罪見怒何過嚴

金繩掛空虛自勉兼示束孝先熙之

金繩掛空虛日月繫兩垂天童坐戲弄縱掣成東西百
年未死閒晝夜無窮期短短固可惜舒舒定非宜有聞
未之行有學未及知白髮已斑疏朱顏亦童黎智慮昏
晚年聰明退前時縱欲加自修去日何勝追奈何少自
廢老則成空悲

寄洪與權

與權江南來適自滿門會初無合我志財以客面待時
時相鉤探稍稍互酬對根源豁披張扁鏑失分解君然

領還嗟我恐敬若戴相逢時既多相待兩交快予初請
 子交子曰何可外中又謝不德卒曰吾而愛旣而第以
 年子合我兄拜揚雖士云多徃徃事冠帶中間滿夫子
 崛起百萬最更以子從之而吾米則稗朋從偶許攀會
 合日與在春晨巧誇招月夕因論話書狂逸飛蛇碁毒
 甚含蠱相謀務奇勝聚口笑拙敗貪驩不知久歲律忽
 移再予飢奔先西餓色面留菜子待去亦恨書以問我
 奈別來君何如思子我心海朋分無舊歡世險有新態
 高言足瑕疵俗學牽細碎貧知身責重病覺學力怠壯
 心已無多況去日有退預期後相見頑陋徒老大好勤
 寄子書思子百憂萃

寄滿子權

子權今何謂久不治簡書子素賜我多豈以此遂疏子
亦如常時病與貧相俱冉冉草沒階客腳不蹋廬貴者
事名位崖岸誇懸殊賢者縱肯來顧我欲取一本作無
惟餘齷齪徒我亦羞與居潭潭一室空編帙環三隅暴
陽不憂償偷飽幸未誅且可延朝昏憂思老頑愚獨有
思子懷涕下時暗鳴

冬陰寄滿子權

玄雲載雨惜不下北風吹急水相黏周遮覆蓋不通透
鋼結已厚難披燂微陽未復老陰壯計去暖律時猶淹
青天何可一日失漸恐此去無由瞻日馭自懼不得脫

略出急入地下潛憑陰託寒恣凌爍風伯得意

一本志作

欣

沾沾但幸天公不省悟誰顧下地人嗟讒隔絕霜露曠
不下帝有潤澤何由霑非惟句芽凍大折亦恐萬類由
茲殲九龍銜火互相暖稱有日職借不甘羣兒銳奮不
量度欲仰吐氣吁以炎唯有壯士抱劍卧思得美酒聊
自酣

廣陵先生文集卷三

廣陵先生文集目錄

卷四

弱弱誰氏子

贈黃任道

答黃藪富道

春風

長風

東風

哭詩六章

張巡

贈李定資深

古廟

雜詩

猛虎

答問詩十二篇寄呈滿子權

罇問末

末答罇三首

末問罇

罇答末

末問斧

斧答末

水車問龍

龍答水車

水車謝龍

龍謝水車

秋懷

中夜

士常患不學

舉舉媚學子

秋日

秋興

翩翩水中舟

書懷寄黃任道滿子權

今既有高郵之行而東孝先兄弟索予詩云

酬東丈貺詩兼敘所懷

惜交詩贈東孝先

再贈東孝先

廣陵先生文集卷四

逢原王 令著

弱弱誰氏子

弱弱誰氏子鮮鮮一何姝來奔富人家妻與富人俱一本

居作嚴一本嚴作華妝問夫子我豈彼室如夫子笑遣之彼寧與

汝舊本都升堂一本作褰裳由阼階德色溢以舒親賓不敢

笑退語相噉吁高堂聚羣婢唯諾相咨睢家事忽不圖

頤指取自如朝令折桂薪暮遣藩籬除風雨半夜來百

覺生不虞屋壓盜隨至夫死別嫁夫東鄰有淑子一本作女

性一本不事鉛朱端居待人求正色不願諛清鏡見一本作括

照白髮行媒不願聞不知愛妻人取捨何異噉

贈黃任道

長河之流幾萬里駭若瀉自天上來奔湍衝山拔地去
直有到海無邪回人之所觀乃流沫猶以激射憂天摧
想其根源發聲勢如縱烈火燒千雷古來走死萬萬腳
竟莫識自何來哉吾疑鴻荒混沌日衝破天地之元胎
夸娥搖頭巨靈走避不敢道曾疏開耒耨之成乃畎澮
欲計議此誠可哈長帆大艦不敢絕尙恐飄去無垠涯
愚兒腳慣蹋潢潦安敢逆此加泝洄

答黃藪富道

角角適時足力走猶或遲從而逮人不若坐視之而
子始用此已無先人思閒自念斯世固亦未易爲以其

得而慚曷若退自宜老身可孔顏餓死猶夷齊予心最

樂此尤喜用自持豈將六尺軀賤易五羖皮但無百畝

田得

一本作可

抱剛氣歸年來事窮蹙露暴無自依姊寡不

能嫁

一本作無爲家又一本作不得家

兒孤牽我嗟平生事文字無路

活寒飢勉從進士科束若縛襁兒時時忽自笑

一本作笑自忽

徃徃窮加悲

一本作還窮悲

有如高飛鳥中路飢自低銳知從

食來不意身投繯神龍拏白日挾雨萬里飛使其

一本作之

口有銜安得無馴隨雖然平生志固未忍散遺閒時自

開縱哦吟助噓噓財將舒

一本作輸

已私豈敢偷人知黃君

道德者術業何願願手提九黃鐘旁取折籥吹懸知失

氣類誤以唱和期不知里社歌不可郊廟施況余衰病

餘有氣亦已卑加之困俗學羝角方牽羸陳詩盡自道
幸子憐無疵

一本作疵

春風

春風東來暖如噓過拂我面撩我裾不知我心老有異
亦欲調我兒女如庭前花枝笑自愛風裏草力更相扶
旁林曲樹足飛鳥不聞燕雀鳴鳶鳥求雌要雄各有意
豈但鬪競爭春呼春巢成多夏卵眾明年計此更有餘
非唯喧呼亂人耳漸恐巢穴妨人居收殘射中豈無道
我亦力可彎長弧林深枝曲矢不入況弓待借家所無
行吁坐眊不可奈安得靜默投身俱

長風

長風吹百草勢力亦隨靡地長風易休草力復隨起長風誰令歸風去何時來百草艾正繁蘭生爾何哉

東風

東風來幾日窮巷不見春不知得花由只見插花人東舊本作春風能幾時聽爾多歡欣徒恐春風歸汝我同悲幸

哭詩六章

死者徒已死思之恨無涯生者非素心還爲死者嗟今古悲略同斯道竟奈何哀絃直易絕哭詞曲難歌

朝哭聲吁吁暮哭聲轉無聲無血隨盡安得目不枯目枯不足歎無目心自安目存多所見不若無目完

切切復切切淚盡琴弦絕憤氣吐不出內作心肝熱朝

漿渴不勝莫潦濁不清何以慰吾懷安得滄海冰
哭莫傍滄海淚落長海流流深風濤多駕蕩覆我舟不
若酒春草荆榛蕪蔓莖怨氣觸草死猶得香蘭生
朝歌憂思多暮歌無奈何偶歎氣亦絕未慟血先泣淚
落入口少不如出眼多安得堂堂軀不爲瘠且瘡
目雖淚所出由來心乃源白日照我面意欲乾洗瀾而
不照我心我淚何由乾況在重雲遮使我何自安

張巡

祿兒射火燒九天鬼手不撲神聽旃羣庸仰口不肯唾
反出長喙噓之然睢陽城窮縮死鼉危繫一髮懸九淵
巡曠遠睨兩背拆一本作拆兩背怒嚼齒碎鬚張肩恨身不毛

劍無翼不能飛去殘賊嚙翁軀腥刀子磔俎日嚼肉血
猶經年霽雲東攘兩臂去西來才有九指還胸中憤氣
吐不散去隨箭入浮屠塼忠窮智索莫自效更鬻愛妾
嘗飢涎我疑沒日賊不食恐其肉醜死不痊又疑身骨
不化土定作金鐵蕤重泉何時山移陵谷變發出鼓鑄
戈或鋌吾如得之願有用不誅已然誅未然

贈李定資深

涉川固有道造舟不如梁曾聞水覆舟不聞死乘杠奈
何揭厲子先先勇褰裳豈盡水害人固亦謀非臧

鳳雖謂靈畜無竹或一本作絡死飢竹今無方無鳳來亦云

一本作何時使之羣一本作隨鴟鳶飢飽爲止飛非惟失所一本作厥

靈亦與彈射期

坦坦誰之田施施繳且弋烏來玩其機鵲至喜其食長
鴻飛冥冥志與萬里極豈無啄飲心寧飢不人得
湍激日蹙蹙風稜勢漫漫奈何舟上人試死才一間苟
不以利涉安坐思誠艱客雖懼謀梁而木嗟在山

古廟

古廟隆隆敞庭屏風雨剝壁頽柱榱我來安知神所依
穹堂悉率風幡旂神君龐軀突鬚眉視我睨睨坐倨箕
惕礫觀者駭不怡羣鬼後先張福威直東之廂步逶迤
目益所見怪可噉馬牛羊犬雜豕雞或戴以首旁四支
閒有人面身亦非老祝趨前爲眾詞口吻囁嚅言嗚咿

稱別狀類顧東西唱號名字分何誰空虛冥漠非所期
豈亦以此爲人尸視其膚革已彪狸寧有中反恬肝脾
又有械器身挈持一本作提勢傳言癘疫此乃資古之日行

歷虛危猶恐盛陰鬼所隨磔儼于門驅使馳今安取此
廟以祠不念延虐殆尅羸農凶年多苦餓飢苟幸得飽

不擇

一本作釋

祈來則拜叩盡敬祇幸天之澤偷自歸民德

且恐報之時餼肴豐鮮牲魚肥欲奠以獻更濯卮進謝
千語拜百低工鼓于庭巫舞衣祝傳神醉下福禧農謝
神去祝徹之庭前匕割棄餘遺鵲爲下爭趁不飛回顧
神面如故時意者不爲祭謝移嗚呼神固一本作信非吾知

雜詩

方春不種蘭終歲無自佩良田弗加芟徒穉亦無歲空
令雨露恩日夕被蒿艾安坐飢怨天此理果誰在
一日不爲田百草已有根況復間三時其穢何待論豈
不有錢鎛徒羞傭借勤歲晚憂不耕何獨議耒耜
穉穉晚春樹上下聚百蟲不有口似蠶則生尾如蜂設
不二者然亦徒生無庸清陰不可居晚歲還秋風

猛虎

猛虎出白日其欲未易量人人有怒心常懼不敢戕壯
士獨何者忿氣裂怒腸脫身拔劍去奮躍如驚翔雖挾
必勝行豈無邂逅傷虎不食壯士壯士自虎當意貪眾
人完豈暇爲軀防虎死眾人惠虎存憂一鄉果哉彼丈

夫賴有一劍將使其無所操未免伏道旁有劍不刺虎
爲謀信非臧無劍徒虎爭雖勇適爲狂利劍亦可嗟人
有我獨一本作獨我亡日暮南山阿直道何可望一虎固已
爾況復千豺狼

答問詩十二篇寄呈滿子權

有序

令旣愛盧仝蕭宅二三子之詩而猶恨其發之輕也
然忘其效而更重之則得矣逮子權之起予子實慕
之輒爲十二篇其題亦不易子權所謂東墅諸子答
問者余獨廣之耳其水車之篇獨異於子權然特其
文則然我知子權與吾與它知詩者謂爲不異也

罇問末

金堅雖不磨木曲亦已揉幸蒙主人用反要主隨走適
一作本慵耕兒雖功不見取良田常無收何塞不耕咎

耒答耨

我用常在金任金適由木苟得金爲用何惜木微曲幸
得主人隨不恤汗行犢必求隨主人我用誠不足
我用於主人良田無虛種主人不我以我適爲無用不
知主人飢卒歲安自奉由來我求人孰與求我重
我必爲人用不必用于天若也貴不耕君其問諸田

耒問耨

一畦失之荒爾力亦可耨天下方漫蕪爾功亦何有

耨答耒

天下方漫蕪願我適有庸使其已除修我將何以功我
豈大無效

一本作無人用自是用我慵

未問斧

子斧誰爾爲黑白太分別朝伐一樗死暮伐千樗斲爾
終不自謀幾日

一本作幾何不缺折

斧答耒

大樗吾猶伐小樗何畏斲我缺猶俟磨爾折將奈何

水車問龍

來何必召雲去何必飛天我名不爲龍何能雨爾田

龍答水車

神龍謝子車子能未足多上潤雖已然

一本作足下竭將奈

何

水車謝龍

水車謝神龍下竭固無奈旱則我爲用爾龍尙何謂

龍謝水車

神龍謝水車吾語爾來前爾雖用於人我亦用於天在物固不同於用豈殊然水下高田乾爾能俯水取假人不爾用爾受田責否我雖身爲龍動亦天所主天猶不有命我安事爲雨

秋懷

槭槭庭樹葉朝零非昔稠叻叻草蟲鳴暮急曉未休爾盡無不平豈亦有哀憂胡爲勞吟呻與士傷感投壯士

亦何者哀哉與蟲酬所抱不列陳調苦難謠謳高自有
遠見直懷羞曲求蒿藜襲久安功名忘前收日月忽未
幾天地今復秋少壯負所懷老大將安謀生無及人功
死骨蕕泉羞胡爲不奮飛徒與寒餓飢

中夜

晝日苦卒卒忽焉

一本作然

不加思長夜漫不眠起復日所

爲所爲浩多媿不與初心期虛云聖賢學實從庸俗歸
雖恥猶奈何長歌涕垂頤

擾擾從俗爲日與所學戾茫茫坐三復心面自相媿守

道惡從人取俗

一本作食

患高世誰令二者異不得一吾致

士常患不學

士常患不學不學常同然學成安所施用捨繫之一本作諸

天孔孟去已久寥寥泣遺編斯道未易爲今古如同年

舉舉媚學子

舉舉媚學子居曰不我知知而有不能無乃失於欺不知未爲患不欺浩難期咄哉天下懷何以天下爲

秋日

秋日不照天秋雲自明晦脫葉下衰草蝸蟬事今退天地功方成草木猶怨頷志士感所懷長吁下清淚

秋興

秋風吹人有高興醉懷感物傷盛衰秋來縱得蒿艾死歲晚已非蘭蕙時哀哉不入俗耳聽大笑自與萬古期

長鴻冥冥爾飛好雖有緇繳安所施

翩翩水中舟

翩翩水中舟既滿何用載主舟者誰子無乃忽於敗兼
濟雖期仁過任適爲害自是人致然已溺何足怪

書懷寄黃任道滿子權

西風吹雲空晴日露高曬駑馬無速騁歸客思遠屈長
林剝霜紅遠水漾寒派露蟲悲自一本作且咽風菊老尤介

昔子來方春燄燄樹生熊今歸亦未幾馬蹋落葉壞時
物固有然盛衰信難概吁嗟爲生勞黽勉計無奈伊余
有遐致久此困俗械嘗思擺絕去自放出世外高懷樂
天寬遠目斥人礙有田足晨昏有圃具菹菜父母不待

養妻子固易賴世孰得正山亦孰失蒂芥人自能輕重
吾將守所愛六經老誠明萬古熟成敗得時爲醢鹽滋
味和鼎鼐失猶有萬世令名自沽賣自視久已明決不
俟謀蔡寄詩侑子觴期子和而再

令既有高郵之行而束孝先兄弟索予詩云

擾擾利學者久不可與謀讀書乃何爲老不知軻正弗
恤義所在務期高爵收嘗聞失則嗟不聞得之羞知誰
洪其源使世乘其流于今已汗漫更久將遡游嘗聞占
人言饕餮爲其堯謂惡豈必多偷飽德弗修不知自思
者捨此何所由故予早知懼誓將異人求寧爲寒餓嗟
不同富貴謳此行況有獲師德高前修因嘗請子行勉

子無逗遛於吾乃何有同病不獨瘳雖愛謂子然尙疑
子終不惜子有高材竿幢揭華旒苟能自擺去不爲世
學囚行將見遠到強弩射弱菽何必請子詩自合治子
翰

酬東丈貺詩兼敘所懷

白日立中路犬去不形相夜以盜自來何敢怨犬傷主
人忽加念謝怒犬無良盜子媿伏前有言願加詳見賜
固已多怒犬誠未滅

惜交詩贈東孝先

千金得寶刀不若得錘歸寶刀雖云利邂逅傷瘡痍傷
瘡有復日傷皮無完時不若遠所傷取錘安自持一鑿

以成井再鑿深不賞清泉冽其中定德發不移飲可沃
吾心浴能清我肌此道如必尙一本庶幾有常爲旣庸
銘我前又書薦予知

再贈東孝先

玉缺見不撓劍折知真剛張目不見心人固未易量念
我未知子徒知一本外觀望安識子所懷赤日包白光
去去終我身兩兩無相忘縱子道路憂骨尙付子藏

廣陵先生文集卷四

廣陵先生文集目錄

卷五

卜居

聞哭

養賢

送李公安赴舉

離高郵答謝朱元弼兼簡崔伯易

東園贈周翊

龍角歌和崔公度伯易

春人

送贈王平甫

山陽思歸書寄女兒

大舟

望花有感

小雨

餓者行

世言

暨陽居四首

寄題宣州太平縣眾樂亭

爲孫莘老作

謝客二首

春遊

一本作
城西遊

遊江陰壽寧寺

賦黃任道韓幹馬

甲午雪

廣陵先生文集卷五

逢原王 令著

卜居

吾求一屋逮兩月貧不謀貴

一本作富

何以圖揭來自放就

窮巷幸得之喜何敢吁顏檐斷柱不相締瓦墜散地梁
架虛門無藩闌戶不閉時時犬彘入自居主人憐我莫
自致爲我補葺加埒塗翻翻匠氏乃誰子頽頽作氣厲
叫呼羣庸洶洶助聲勢睥睨凌我要我酷歸來歎息無
自得兩日財致酒一壺微多償少意不愜棄我忽去如
逃遁重來闐寂不可問依舊四壁編空蘆嗟余雖貧日
猶曩可不善爲盜釜謨外戶不閉古則爾今也盜賊通

街衢乞錢買籬作藩固更學關樞防朝晡鄰翁問我乃
何者得無亦以名自儒王朝潭潭聚冠蓋幾人不載卿
相車子何布被不蓋肉浪自名士實則奴假爲無能等
編戶猶可自擇安閭閻胡爲慘戚卒困此去矣何屋不
可徂此居卑注不待說四高中下流無渠夏霖連延久
積注往往竈下秋生魚始來圖此不自擇終見坐與蚯
蚓俱何況梁榱日蛀一本作傾腐一仆非爾力可扶苟求暫
安急旦夕反以身就殞壓虞迺知窮則失自愛死得正
命有幾且翁乎爾言誠得矣我方困甚非真愚

聞哭

冬溫春疫早死者晨滿街但聞哭子悲不聞哭母哀孝

慈愛益深剛壯氣則乖嗜欲奪天性情恩占妻孩詩三百具存聲已亡南陔人情古不美況復嗟今哉

養賢

萬鍾豈不多財得孟子辭千乘友子思猶曰須我師古賢不易養不養則已而今賢養自易無於古加疑

送李公安赴舉

行子冠上塵梁宋道旁土塵逐冠弊捐人來還復去馬蹶日月長躡盡西北路近者何紛紛姿狀頗秀舉傳言天子詔士得四方起來如鵠翅翾去若蠅頭聚市兒屈指計過百日未暮昔周方盛時得士纔十數唐虞此爲盛中復容女婦昔何稱才難今也寧異趣但恐所取異

今古殊尺度夫君乃高才久有及物慮今又奮絕去挺
拔欲自樹余窮非所知久有山林素但無百畝粟乃就
羣才賦任道得亦嗟困窮失爲懼二者各有命子亦何
所與

離高郵答謝朱元弼兼簡崔伯易

一本作令去高郵元弼辱

惠以詩乃強令答既辭以
行而思所厚不敢默也

昔來何悠悠今去亦泛泛豈自果進退姑且便飲啗三
代去今遼士食久已濫徒死不爲義可無苟石僧平生
墮百爲且就役鉛槧束身入世程開口就人歡怒喜有
失得眉睫煩窺瞰野鳥或在籠山猿有終檻能安此爲
命雖失亦何一本作何所憾子嘗勇自明磨古得前鑑抱關

賢所容較獵聖或暫庶未負初學尙爲神所監子行人
之嗟我笑不爲領子獨辱所厚以詩繫歸纜命和始自
書狂言庶非僂

東園贈周翊

嘗聞東園游觀嘉晚趁時節亦自到東風不知來者多
一日芳蹊蹋無草山櫻著子寒尙遲江梅殞藹香可弔
扶疏枝葉未成陰偶來正值斜陽照千株紅杏暖自酣
風引萬炬燒晴燥天桃未老已抽青略略朱旗冠翠纛
雖然素李不爭華似洗朱丹誇瑩皓其他百種不可名
如列錦繡快晴曝何低何高何後先一一盡解承春笑
楊花輕佻最得力飛過青天去何冒弱柳低垂弗辭賤

以力憑風爲春掃黃鸝嘲啞

一本作啞啞

聲語和似對遊人

見情抱蝴蝶填委不知數飛亂人眼漫顛倒黃蜂雖忙
不爲身以甘遣人竟何道子規終日勸客歸吾無閒然
念何報嗟余多病所趣乖又嬾謹呼逐年少經年一春
爲嘉時行過不恤每自譙雖然無酒不解歌素遊尙少
貧交召何時期子早再遊風雨不可旦夕料

龍角歌和崔公度伯易

嘗聞螭出軒轅其長百尋圍十牛民驚臣愕爭論酬
帝亦謂應土德修賜螭傍海連十洲俾朝食壤暮飲流
仍命九龍狎其遊視龍有角急起羞亟去訴帝龍可憂
帝憐不呵許爲謀召也龍食深其喉揮萬力士乘其頭

披肉斲角塞螾求螾取而冠萬鬼掀雷號電

一本作雨

泣竟

莫採黿鼉踊弔蛟虬奮穴出哭勞鱗鱗八龍怒走乞
天讎天賜六丁皆劍矛取螾拔角磔大幽下龍載帝問
何由臣攀墮髻不可留竟去不知天所尤龍冤雖復骨
不收流傳下古說易一本作益浮我聞其語疑有無以龍易
螾理若不愛不知蔽似有絲人皆傷龍爲歎啾我獨鄙
其與禍投嘗聞龍德神自周出飛于天入海休棄此不
處與螾儔以養就人理固偷果死以此嗟何仇我來但
愛遺角鯨是非欲竟理莫搜君學窮物功一本作乃折培其
說引挽萬蠶抽當有實論破眾廋勉矣投以釣海鉤

春人

春人輕飄喜聚散春筵笑長白日短柳芽嚼雪噴晝寒
桃花燒風作春暖春衣少年當酒歌起舞四顧以笑和
紅天綠爛狂未足春更不去將奈何

送贈王平甫

士學何漫漫近習忘遠紹文章多自名誰出得高調子
才希世珍拔俗起孤峭如解萬里駿不以羈縻要篇章
綴清新霞電絢天影一本作標夜歸借之讀掩紙疑有耀洗
手脫世塵飛身就遐眺古骨誰謂朽死魄如可召縮手
不願學神功謝人妙余材生何偏日月費吟嘯收奇欲
身名攬古願獨弔平生勇前爭未始卻自料一日接大
敵讒舌忽忘挑如秋九磨鏡迫我以醜照貪觀朝日明

退失兩目瞭願假斤斧惠刻形近天肖寄聲誠甚勤獻
璞定逢笑

山陽思歸書寄女兒

淮風晴舒舒楚水日夜流風能駕吾帆水可載我舟余
歸知幾時子望懸百憂念我兄弟寡商參各殊州十年
不一逢會合何所繇幸逢子來歸與我相慰投甥兒入
吾牽甥女出我留子吾笑其閒貧不知可愁心如熙春
陽樂若醉九酬憶我別子日將行更逗遛泣恐傷子心
淚出仰目收別日財幾時別思日九秋心隨西北風目
望東南樓主人仁且賢憐我羈旅遊晨粳玉炊香暮酒
金注甌盤蔬羅春青豆脯兼夕鱸爲食豈不美義咽不

下喉要當歸子同半菽飽亦優始予志所學義當望軻
正竭來與世評眾口忽起咻嘗觀世金朱此道久已偷
胡爲不奮去附世如贅疣而子亦待人特以貧不謀參
差兩如此偃蹇勢略侔要當共引去逸出世網罕遐追
避世徒子與侍巾裘吾將亦娶婦力以石臼求買田結
歸廬種樹屋四周子居課桑蠶我出鞭耕牛教妻績以
筐使兒餉來疇坐笑忘歲時聚首成白頭歸乎當何時
詩以侑子謳

大舟

大舟無風帆不舉小舟榜入青冥去舟中漁子呼且歌
夜半鬪魚誰得多

望花有感

春來幾時余不知但怪日日柳梢好我嗟無地自種花
常恐東風只生草誰家有園不可入時時縱足信自到
寒梅最香落已闌桃杏雖遲亦顛倒高枝飛鳥夜蹋空
低樹狂兒日摧拗惟餘零落滿地紅主人更聽奴頻掃
歸來四顧慷慨歌要且傾酒澆顏酡春歸欲挽誰有力
河濁雖泣庸奈何

小雨

一夜風聲驚屋破四鄰叩壁呼我賀久知旱勢非所期
果見雨逐浮雲過庭塘流注已有餘田畝不霑亦何奈
一本作那雷嗔電笑竟奚爲幽人空廢南軒卧

餓者行

雨雪不止泥路迂馬倒伏地人下扶居者不出行者止

一本

午市不合人空衢道中獨行乃誰子餓者負席緣

門呼高堂食飲豈無棄願從犬彘求其餘耳聞門開身就拜拜伏不起阿羣奴喉乾無聲哭無淚引杖去此他何如路

一本

旁少年無所語歸視紙上還長吁

世言

紛紛世俗言病

一本

客久厭聽聖賢沒已遠是非久無

定六經紙上言黑白欲誰證獨有自信人中得不外競

暨陽居四首

出無王事牽入不治居舍蒿藜

一本

入牆屋塵垢變几

架槽糠苟無憂智力取自暇逢詩卽廢日得客輒忘夜
積嬾遂成性習勤反如詐幾不類怠傲媿恥將何謝

身非爵與官車馬久不謀家無田食儲雀鼠非我仇朝
出從人居詩書講前修暮從兒子嬉歡笑何所憂閑將
筋力疲嬾使志慮收斗糈尙煩一本作須送誰謂能無求

自吾暨陽居已見月四周流年不我謀寒暑忽已邁老
來何足歎一本作嗟苟死固可羞于今用力薄暮齒將何收

斯道久泯泯斯人固悠悠歸豚非吾心在禮惡不酬從
人效屈伸俛仰豈一本作不自由於命有當然信矣何足羞

寄題宣州太平縣眾樂亭爲孫莘老作

令君架亭樂荒幽得地適與萬景投亭成雖名爲眾樂

地僻無客誰與遊。訟休民去吏隨散。獨有文字與令留。

把書開闔坐自笑。回視令職忘卑陬。昔聞酒賤喜易醉。

今說魚美子。

一本作餘

何憂彈。

一本作橫

琴有聲。尙近俗。要解絃。

絕以意求。況持高懷。屈下邑。志氣略與彭澤侔。身嬰民

憂。手持

一本作提

版心。愛山水。寧非偷景。好不見。但聞說。使

我耳目私相讎。亭前行跡不破草。庭

一本作亭

下野鳥常喧。

嗽山雲朝噓翠。巖出海月夜下清。溪浮春華夏蔭已可

愛。況使風雪

一本作馬

回。冬秋惜子不得與。快意其上岑。翠

望九州黃山聞好眼。未識夢想欲到迷。無由圖傳粉墨

固未好。願假壯筆一攬收。果逢來篇騁雄勝。

一本作怪

君執

造化窮凋

一本作雕

鏤

一本作搜

一時文工豈不偉。千里寄我何

以酬耳昏俗語久欲洗爲我一謝山前流

謝客二首

擾擾車馬客各

一本作出

以勢利奔自問闔巷人何爲亦紛

紛與客成往還勉就俗所敦禮不經聖人頗厭後世煩
欲問無所得歸視紙上文以非孔子心尙拜陽貨豚乃
知偈仄閒心跡久已分去矣可奈何更問來者門

蹉蹉出何爲奄奄歸就卧不知身所謀徒與俗相和本

無聲利求

一本作出官

久厭車馬過詩書雖滿前奔走不暇坐

收身衣食餘抱病歲月破得不勝所忘進亦

一本作出益

何可

課前躡杳

一本作出奔

難躋下愚旋易

一本作出知自

墮得勢有然爾

命矣何可奈

一本作出非所那

春遊

一本作城西遊

春風誰相呼鳥語到庭戶罷書起何遊

一本作住

繫馬城西

樹寧須客眾隨聊與春相遇高林美風竹疏影有清覆

可以便行坐解脫快巾屨日長天地寬飄旻飛雲度風

枝綠未柔

一本作舒

日萼紅先露芳辰信可尙嘉興惜無寓

舊聞黃公壚頰

一本作屨

枉壯士願予雖輕數子自適偶同

趣起解身上衣就貰青旗酷獨酌不待勸

一本作誰勸

興至

還自注對物無所語似若喧譁惡雖無歌舞歡幸可篇

章賦乾坤本閑暇人物自紛遽勞生曷不樂歲月失已

屢酒闌起四望落日不可駐飢馬自知家何須問歸路

遊江陰壽寧寺

寥蕭枝上風，蝸蟄以秋告。黯黶道旁樹，綠蔭涼可冒。況

承積陰餘急。

一本作忽

雨蕩晴昊初涼暹。

一本作聘

新威宿暑懲

舊躁漫漫。

一本作悠悠

出門路踽踽，可誰造江聲。洵西奔海

遠劇，東到中閒可行望。洗滌

一本作灌

去塵

一本作陳

抱況於林

阜閒，古屋架晴燥。蚊蟲稍斂，收軒戶可淹。傲惜乎余獨

遊不可

一本作自

攜所好，踟躕仁歸步。風竹冷相勞。

賦黃任道韓幹馬

天寶天子盛天廐，吐蕃入馬上天壽。紫衣馭吏徧坐前

騎，入都門不容驟。西極苜蓿得氣肥，六閑飛皇卧羞瘦。

千秋

一本作承明

殿下誰把筆，當時人無出幹右。傳聞三馬

同日死死魄，到紙氣方就。鐵勒夾口重，兩銜墨絲巾尾。

合雙紐天門未上人就觀老胡驚嗟失開口生搜朔野
空毛羣死斷世工無後手當時天子惜不傳送入御府
置官守胡塵勃鬱燕薊來宮闕蕭騷旣焚後誰棄千金
出手收足蹋萬里避奪走幾經蹂棄道邊塵今日寧無
紙上垢罇前病客不識畫但驚馬氣世未有西北駿骨
無時無生不逢幹死空朽世手無能不肖休任使氣骨
陋如狗

甲午雪

平居汨汨喜自墮萬事過目不省窺一年南北兩見雪
未始把筆成一詩朝看氣象浩茫昧夜歸冥想通幽疑
夢乘虛空謁帝所硤磧象柱承瓊懷坦塗壁壘相照射

鶴扇虧蔽狐腋帷帝旁鮮鮮舞萬女寶綃雅冶吹裳衣

纍纍

舊本作珠

貫瑀錯組佩斥棄朱黛素兩眉掠搔王母戲

華髮袒脫

一本作指點

姑射爭膚肌提璫擲珥互投報顧我

塵垢加笑譏其旁臨臨立萬鬼帝所寵與借色辭密阿

細紵賜裘烏笑齒發露寒差差諸神斂

舊本作畏

避不敢望

棄唾墮落成珠璣朝懽噦怡弄煙霧暮慨吁

一本作呼

吸成

雲霏互偷天帑購黨與散布

舊本作布散

萬珏分千珪紈羅

練穀不計數

一本作較計

逆取倒曳交橫披鞭驅巨靈劫夸

父揮斧解繫

舊本作擊解

關星機東觀厖頽墮壁角南顧禿

鬻亡斗箕其宅雜冗

舊本作冗小

莫分辨徒見漫亂如籬節

雷公爭前泣訴帝至此豈可無省知顧分羽衛勅

一本作急

天討助以積雹千山

舊本作山千

齊金神擁遏

舊本作前驅

按行

道後乘駕以萬玉蜺寶刀聯

舊本作斬

翻夾鐵盾玉戟句子

橫珠旗天

舊本作霜

風蕭蕭吹縞素貝甲合陣

舊本作夜合

窮天

圍磨砮插羽注萬矢強弩競發相聯飛姦窮詐極不保

守引組自縛相連歸纍俘奏

舊本作獻

凱闖天陛越雉拔羽

按舞儀帝呼祝融付焚棄散灰下地無留遺徵朋索黨

計輕重斬戮屏翳囚風師扶桑曛曛露軒豁日御復反

天衢馳覺來四顧駭皓白心與恍惚爭是非冬雷無聲

電不照疑亦眾鬼乘其私天高地下非所職且可把酒

無嗟咨

廣陵先生文集卷五

廣陵先生文集目錄

卷六

日蝕

送曹杜赴試禮部

一本作送曹杜二君杜名照字師雄

遊蔣山作

對竹

暮行

野步

古風

蘄口道中

三首

贈廬山老居訥

旅次寄寶覺訥師

一本作旅次寶覺寄訥師

寄呂惠卿吉甫

呂詩附

答逢原

寄崔伯易

寄孫莘老

夏日平居奉寄崔伯易兼簡朱元弼

效古

送朱明之昌叔赴尉山陽

學子

出門

雜詩

一云占人

寄滿子權

梅花

金山

客次寄王正叔

南山雪

廣陵先生文集卷六

逢原王 令著

日蝕

錢塘山人大暑壁日十月朔日旦蝕坐者跳起行者留
愚聞之驚智爲惑我時過市偶自停眩兩目視闕耳聽
自嗟身賤不有位安得置此誅四刑惟此丙申日在未
天而黯鬱昏不霽舉頭仰日已半虧羣陰得志雲不披
塵函欲開鏡尙掩誰把白璧塗之泥大哉玄象浩一本作號
難測安有庸人以術得天乎反成監子名不念吾皇禳
以德吾聞日名爲大明光一自出滅月星今乃爲之成
薄蝕安得君子不爲小人乘

送曹杜赴試禮部

一本作送曹杜二君杜名照字師雄

霜風琅琅鳴鼓輦烏寒夜噪樹折枝居者不出行者歸
廐馬解銜車棄脂長河夜冰船就維百賈晏起朝閉扉
爲問當今行者誰出門千里到何時毋送拊背父歎嗜
兒惜欲去哭挽衣上馬反顧紛涕洟非所願欲去何爲
家雖有田豐歲稀所得償公不及私況望羶腥事庭闈
結髮從學今十朞始自有志徇孔姬豈願從世成依違
高堂華髮紆素絲暮年待子爲光輝望我日久莫報之
苟得一笑辱弗辭況望舊本作得三釜家無飢吾於二子久
所知怪其才高所就卑今乃語此誠可悲近聞天子愛
典彝欲撥舊冗收新奇子行出仕適其期驛驢得路無

銜羈罷酒行矣無自遲去取天寵酬親慈

同孫祖仁王平甫遊蔣山作

山形鬱盤陀石路隨直紆

一本作迂

蔭松坐與長飲泉百煩

除憶望江上樓采翠橫晴虛愛之不能去取席卧與俱

若逢佳賓客不假外禮拘意愛交自然笑語略可無常

思一往遊杖屨窮昏

一本作朝

晡忽從賢豪招氣類喜不殊

更以肴酒隨傾瀉談笑餘仰躋蒼崖巔下視白日徂夜

半身在高若騎箕尾居懽餘悲感集論說追古初在昔

天下衰羣姦起相屠相地視八極懷險歸此都全吳旣

臣魏餘晉仍避胡此山古所瞻形勢高四隅遊者昔爲

誰名字不見書想當出塵樊盤礴望八區固宜有高興

何亦忘滯濡憶在初元年虎狼出當塗眾豪泣相盟萬
甲聚一呼樓船下三江千里懸旌旗忠謀屈巨猾弱力
張遠圖乞靈訴明神至此嘗踟舊本作躊踟想當得請初勝
勢先羣誅雖時幸成功偏仄已可吁豈無當時人縮伏
巖下廬約身甘賤貧卑勢無憂虞坐視擾擾中同爲禍
福驅我當明時來木石聊自娛遺祠今莫問故邑已成
墟歸謝山下民相期在犁鋤

對竹

竹風何撩一本作寥蕭晝靜發寒籟脩纖諤天官揚揖縱玉
佩豈無俗子過自令幽人愛心虛中養恬節密外禦介
春萌喜含養夏籜竟分解無花與物爭有蔭亦人賴威

威南山鳳爾飛何時屆舊本道遠寧不飢寒枝久虛待
豈非繒繳虞安有羽翮億當奈葉閒蟲蠹爾所食壤

暮行

晴煙去人高暮色上天半山銜日入深雲
星出緩塗昏歸鞍長林近去翎短悠悠宵偃慵
衍衍暮行款南城岌高躋近野匝四坦來期遐
思舒暮會所見罕星星颯風鏗歷歷吹月瑄
一本管靜樂遺世喧清思破塵癩心通
江海浮舊本氣塞天地滿茲興將誰同舊本作
兒輩未宜算清

野步

久嬰末俗喧脫舊本就緣野靜方求巾屨便那暇賓客

命林紅落春衰草

舊本作桑

綠爭夏盛時從老農語久伫行

子聽謂言勞苦後各以

一本作相與

閑暇慶時逢瓶盎沽亦

有肴核稱喧嘲忽無次歌唱仍相詠酒闌紛起坐白髮

忽一本作或

兩凭兒乘旁樹嬉牛卧前籬暝子方困俗累愛

此近天性何當從之歸買舍與相並

古風

古風何寥疏世方盛夸慕利塗劇先趨直軌迷曲駐
渾九河醜乞乞百川注分爭或多歧歛枕纔一趣睢盱
承至歡讐疊謝絕怒財得升斗多勉售形骸雇不知萬
鍾得孰與一日裕況承正山羞願易頃刻遇誰能脫近
役自放就遐鷺航湖足菱魚拔野厭芼茹行招千古遊

坐與來世語延風做虛襟
揖月坐嘉樹此意固有然一本
作自有尙童兒未堪預

蘄口道中 三首

舟行邈棲遲江流涵排蕩
魚驚躍或出鷺下飛何颺交
游偶相捨偃息聊自放回首
失匡廬雲霏暮方上

稍稍

一本作稍稍

江上雨聲入窗壁寒悄悄

舊本作悄悄

舟中人曲

肘自枕眠安卧不成寐
起坐浩長歎離家日逾百行路
忽已千昔與燕俱來今見北鴈還
道里苦不通寄書如
棄捐風水相噴薄歸期渺無端
空令秋夜夢反覆如循
環

維舟泝江流人力與水爭
回視東下人恍如御風行誰

能倒長江奔瀉暫西傾聊用快客意何憚魚龍舊本作鱉

贈廬山老居訥

訥公匡廬老詩句整以雅標韻樂天漳不肖外禮假所
居遠城市絕俗就閑暇岡崖道路惡亦爲佳客下余雖
昔所聞相見今乃乍愛其語言好超絕忽世跨馬昇就
其居燈火共清夜惜不見其壯已老吁可訝高才可施
用售世嗟無價臨別更何論共是忘言者

旅次寄寶覺訥師

一本作旅次寶覺寄訥師

小雨破宿暑曉風忽焉道山深樹翳陰蜩蛩應已秋清
坐想高絕語言誰應酬豈不念一往抱病終自留羈旅
少往還有來或非儔命僕一謝之縱我冠屨休移牀上

高堂解書散牀頭於此有嘉興念世誰與謀獨思山林

人

舊本作
林下人

茲意可綢繆何當買田廬共遂正壑遊

寄呂惠卿吉甫兼簡林伯通

呂詩
附

跋跋門外馬客至知謂

一本
作爲

誰昔面尙未逢那論心相

知揖客拜上堂

一本作拜
客揖上堂

謝客辱弗遺寒暑相問酬唯

諾坐無爲靜默近尤怨多言足瑕疵

一本
作疵

勉從客所論

還願所學非念此廢無益對書坐長嘻

一本作爲此歎
無益廢書坐長

嘻

獨思同懷子念遠莫見之豈無寄我書歲晚得苦遲

聞頗困王事豈無閑暇時況有同僚賢相期在書詩人
生天地閒常苦食所糜去就兩莫謀會合寧有期余病
不自樂舊學益以隳

一本作
日益隳

近者非所同遠者勞夢思

江水日夕東道塗宛而夷寄書當在勤無謂還往稀

答逢原

呂惠卿

晨出趨長司跪坐與之言偶然脫齟齬相送顏色溫
歸舍未休鞍簿書隨滿門相仍賓客過敲午僅朝殮
平生性懶惰應接非吾真況乃重戕賊良氣能幾存
就夜甫得息閱我几上文開卷未及讀睡思已昏昏
自知小人歸昭昭復何云每於清夜夢多見夫子魂
側耳聽高議如飲黃金罇覺來不得往欲飛無羽翰
昨日得子詩我心子先論怪我書苦遲友道宜所敦
豈不旦夕思實苦案牘繁豈無同官賢未免走與奔
相見鞅掌間有言無暇陳嗟嗟茲世士無食同所患

念我力難任聞子謀更艱久知爲之天安能怨窶貧
吾聞君子仕行義而已焉亦將達吾義肯遂爲利牽
東海有滄溟西極有崑崙古來到者誰不過數子尊
子已具車航吾亦爲機輪欲一從子遊不知何時然

寄崔伯易

擾擾閭巷士過我何所爲屢來徒我煩不來我弗思少
年樂知聞喜與客子隨晚歲事恬默與世益參差騎馬
出尋人中路輒自歸歸來亦何樂書史自相期已與往
者親可無茲世違欲語無所得起視北鴈飛念子遠千
里昔別今已替寄聲雖云多所得竟亦稀近者忽報書
期我往就之不知子苦窮繫此不可離尙迫朝暮憂寧

星隱二
有道路資人生少所同老去財幾時子勢旣若此子復
不肯來但恐百年閒齟齬終莫齊詩以寄子招亦以寫
我悲

寄孫莘老

默默不自得勞勞非所任不與君子逢誰復明此心偶
客來自南口有千里音知無木索勤頗復山水吟對之
爲一笑欣如獲千金宣城風物佳古語昔已忱太平又
其右道塗邈幽深溪流渺鬱環山勢屹抱臨況復寂寞
人黃綬事陸沈公田稗旣收客席酒屢斟悔予昔南浮
不往一就尋波濤忘日月疾病廢古今歸來就羈銜外
慮日已侵適時媿非才對客輒自瘖譬如火灸一本作炙膚

暫忍久莫禁唯思百畝田爲可足釜鬻投身脫世箝歛
足蹈古箴寄言所同懷相期在中林

夏日平居奉寄崔伯易兼簡朱元弼

天風變春和晝日差夏永門闌一本作庭閉無事燕雀去益

靜紛翻詩書帙棄散嬾收整時來就枕卧復可取窺省

心恬逐物閑迹闊與世屏鮮鮮南山暖秀色上修嶺一本

作穎苟嫌一本作逃安坐慵還可一本作與遠遊騁自緣智能薄反

得閑暇幸交朋久相遠疏嬾欲誰警

憮憮庭下樹陰影日已敷癰癰閉門人簟席自卷舒高

枝就懸冠曲枝掛裳裾一本作儒還來從此息卧視詩與書

桓桓門外客從徒駕驪駒不知來何聞一本作爲乃肯願我

閩呼兒往應門謂言出在塗非我敢厭客非客與我疏
以子拙語言無以得客娛一不當客意恐與世患俱不
如兩相忘何能效紛如

效古

流沙不勝車弱水不載舟謂言行子歸無苦事遠遊寄
子素絲裳聞子衣苦單失今不來還歲一本晚將奈寒一作後

送朱明之昌叔赴尉山陽

朱侯拜書天上回去以身試百里障青衫飄若風外荷
借馬載出塵土上準眉嶄嶄見天秀如立繫馬萬里望
身軀雖小胸腹寬沛如絕海橫秋漲久宜脫絕事高致
豈願卑冗勞俗狀高堂華髮親老矣四海無家寄几杖

世外言高信獨奇人前腰折嗟已強尉官雖小俸雖薄

猶有餘錢買甘養想當家帷奉顏面綵衣躬

一本率婦作身

子餉詵詵兒女戲滿前累累諸兄坐相向人閒此樂不

可幸一笑自足百辱當時清固應稀盜賊俗弊寧不煩

笞榜好偷閑暇事簡編

一本作編簡

思我寧

一本作能

無文字況

學子

瑣瑣來學子從我問古風謂

一本作吾

言古之人學不求世

功以其明智餘施與天下同能知學爲身自不恤窮通

童子顧我笑是言得無蒙斯道使可遵曾不聞父翁謂

言童子歸盍自謀厥躬吾不能爾言

一本作吾能爲爾言

亦不必

爾從

出門

出門將何從中道忽自思彼懷與爾殊亦合念子歸樂
有詩與書遊有山與陂誰言竟無從猶有影自隨

雜詩

一云古人

古人重非道飢不苟豆羹有爲非其心或不脫冕行如
何後世人以官業其生鄙哉樂欺人猶以學自名

寄滿子權

昔心何悠悠今學益漫漫莽如浮江河

一本作滄海

浩不際

崖岸生雖樂文字勤不償几案重編空堆塵折簡久枯
汗徒如陳市肆表列環四畔已無探討勤胡可賢否按
零丁晚觀玄泯滅舊習象得指來歲期失忘去日算嘗

聞勤惰閒已是愚知判蒙羞欲何顏避恥媿無翰不能
繩已怠何力禁人叛文章觸世嫌議語限客竄時牽好
惡卑俗撓是非亂早衰奪舊剛多病襲新悞心經衣食
艱事廢米鹽半何謀脫身去割跡與俗斷耕荒食新收
鑿室復舊貫念生如冬冰至死僅春泮其閒能幾時何
恃苦自緩翩翩淮南英顯顯士林觀方子未爲遊辱子
昔同閑篇章覲新華論說聽橫捍包奇晚自走去實王
府玩近書何相撩頗以名見謾不知老者拙棄此久已
斷決斷子方勇自樹解轡縱新驛行期拾春青采綬綰
歸腕乖舊本作離思舊歡遷徙就新絆無琴雖自歌有酒
欲誰伴閑暇當寄詩持此資買換

梅花

風吹冬晴變春暖江梅豔豔橫新枝經年不逢閒何久
忽此相遇如有期初開珊珊尙寂寞仙人綴佩懸瑤一作
珠璣後日重來不可辨漫漫月樹留寒輝清香芬敷去
何遠可惜不使蝶得知遊人爭至無日夜對之但笑果
喜誰不知春工用何術搏造萬物皆可爲得非各使出
所巧約與鬪競合一時不然裁翦未易給鞭役眾鬼寧
不噫終年成功一本作巧財幾日旋亦墮壞良可悲傳聞昔
時大烹享九牛合鼎羊豕隨一取所實薦滋味神啜不
吐人食宜安知後世無所用兒嚼不美還棄之古今萬
事皆若此爲爾繞樹成嗟咨

金山

長江從天來意欲以域分西山避之逃東山開爲門木

石

舊本作石木

所不捍土沙固隨奔東西兩通海勢已無完

坤如何中流居獨邊萬里渾坤維賴繫縛地靈煩窺捫

不然已飄泊兩分不相存禹力所不除夫意固可論余

欲沈

一作決

九淵下視萬古根畏強激常情中立愛此墩

詩成欲誰和

舊本作知

感慨心徒煩

客次寄王正叔

夜長夢反覆百暝百到家歲計晚未成客愁與日加長

塗千萬門何地容我過而子壯亦貧與余同一歌

南山雪

世於利祿不擇義苟可走奪足恐蹉家儲千金吝銖兩

不敢盡費烏

一本作焉

用多百年到

一本作至

死財幾日恃若固

有理則邪莊生嘗以富爲病愛其放達與俗過南山夜

雪變羣玉舉以賣世售幾何山翁固亦富自喜稚子無

諛

舊本作謂

貧猶歌

廣陵先生文集卷六